

遼史

冊五



遼史卷四十七

元中書

右丞

總裁

脫脫

等修

志第十七上

百官志三

南面

契丹國自唐太宗置都督刺史武后加以王封玄宗置經略使始有唐官爵矣其後習聞河北藩鎮受唐官名於是太師太保司徒司空施于部族太祖因之大同元年世宗始置北院樞密使明年世宗以高勳為南院樞密則樞密之設蓋自太宗入汴始矣天祿四年建政事省於是南面官僚可得而書其始漢人樞密院兼尚書省吏兵刑有承旨戶工有主事中書省兼禮部別有戶部使司以營州之地加幽冀之半用是適足矣中葉彌文耶律楊六為太傅知有三師矣忽古質為太尉知有三公矣於韓古得為常侍劉涇為禮部尚書知有門下尚書省矣庫部虞部倉部員外出使則知備郎官列宿之員室昉監修則知國

史有院程書舍人則知起居有注刑抱朴承旨王言敷學士則知有翰林內制張幹政事舍人則知有中書外制大理司農有卿國子少府有監九卿列監見矣金吾千牛有大將十六列衛見矣太子上有師保下有府率東宮備官也節度觀察防禦團練刺史咸在方州如唐制也凡唐官可考見者列具于篇無徵者不書

南面朝官

遼有北面朝官矣既得燕代十有六州乃用唐制復設南面三省六部臺院寺監諸衛東宮之官誠有志帝王之盛制亦以招徠中國之人也三師府本名三公漢以丞相太尉御史大夫爲三公故稱三師

太師穆宗應曆三年見太師唐骨德

太傅太宗會同元年命馮道守太傅

太保會同元年劉煦守太保

少師耶律資忠傳見少師蕭把哥

少傅

少保

掌印耶律乙辛重熙中掌太保印

三公府先漢丞相太尉御史大夫後漢更名大司徒大司馬大司空唐太尉司徒司空又名三司

太尉太宗天顯十一年見太尉趙思溫

司徒世宗天祿元年見司徒劃設

司空聖宗統和三十年見司空邢抱質

漢人樞密院本兵部之職在周爲大司馬漢爲太尉唐季宦官用事內置樞密院後改用士人晉天福中廢開運元年復置太祖初有漢兒司韓知古總知漢兒司事太宗入汴因晉置樞密院掌漢人兵馬之政初兼尙書省

樞密使太宗大同元年見樞密使李崧

知樞密使事

知樞密院事

樞密副使楊遵勛咸雍中爲樞密副使

同知樞密院事聖宗太平六年見同知樞密院事耶律迷離已

知樞密院副使事楊哲興宗重熙十二年知樞密院副使事

樞密直學士聖宗統和二年見樞密直學士郭嘏

樞密都承旨聖宗開泰九年見樞密都承旨韓紹芳

樞密副承旨楊遵勛重熙中爲樞密副承旨

吏房承旨

兵刑房承旨

戶房主事

廳房主事卽工部

中書省初名政事省太祖置官世宗天祿四年建政事省與宗重熙十三年改

中書省

中書令韓延徽太祖時爲政事令韓知古天顯初爲中書令會同五年又

見政事令趙延壽

大丞相太宗大同元年見大丞相趙延壽

左丞相聖宗太平四年見左丞相張儉

右丞相聖宗開泰元年見右丞相馬保忠

知中書省事蕭孝友興宗重熙十年知中書省事

中書侍郎韓資讓壽隆初爲中書侍郎

同中書門下平章事太祖加王都同政事門下平章事太宗大同元年見

平章事張礪

參知政事聖宗統和十二年見參知政事邢抱朴

堂後官太平二年見堂後官張克恭

主事

守當官並見耶律儼建官制度

令史耶律儼道宗咸雍三年爲中書省令史

中書舍人院

中書舍人室昉景宗保寧間爲政事舍人道宗咸雍三年見中書舍人馬

鉉

右諫院

右諫議大夫聖宗統和七年見諫議大夫馬得臣

右補闕

右拾遺劉景穆宗應曆初爲右拾遺

門下省

侍中趙思忠太宗會同中爲侍中

常侍興宗重熙十四年見常侍韓古得

散騎常侍馬人望天祚乾統中爲左散騎常侍

給事中聖宗統和二年見給事中郭嘏



門下侍郎楊哲清寧初爲門下侍郎

起居舍人院

起居舍人聖宗開泰五年見起居舍人程肅

知起居注耶律敵烈重熙末知起居注

起居郎杜防開泰中爲起居郎

左諫院

左諫議大夫

左補闕

左拾遺統和三年見左拾遺劉景

通事舍人院

通事舍人統和七年見通事舍人李琬

符寶司

符寶郎耶律玦重熙初爲符寶郎

東上閣門司太宗會同元年置

東上閣門使韓延徽傳見東上閣門使鄭延豐

東上閣門副使

西上閣門司

西上閣門使統和二十一年見西上閣使門丁振

西上閣門副使

東頭承奉班

東頭承奉官韓德讓景宗時爲東頭承奉官

西頭承奉班

西頭承奉官

通進司

左通進

右通進耶律瑤質景宗時爲右通進

登聞鼓院

登聞鼓使

匭院

知匭院使太平三年見知匭院事杜防

誥院

誥院給事耶律鐸幹重熙末爲誥院給事

尙書省太祖嘗置左右尙書

尙書令蕭思溫景宗保寧初爲尙書令

左僕射太祖初康默記爲左尙書三年見左僕射韓知古

右僕射太宗會同元年見右僕射烈東

左丞武白爲尙書左丞

右丞

左司郎中

右司郎中

左司員外郎

右司員外郎

六部職名總目

某部

某部尚書聖宗開泰元年見吏部尚書劉績

某部侍郎王觀興宗重熙中爲兵部侍郎李澣穆宗朝累遷工部侍郎

某部郎中劉輝道宗大安末爲禮部郎中

某部員外郎開泰五年見禮部員外郎王景運

某部郎中聖宗統和九年見虞部郎中崔祐諸曹郎官未詳

御史臺太宗會同元年置

御史大夫會同九年見御史大夫耶律解里

御史中丞

侍御重熙七年見南面侍御壯骨里

殿中司

殿中聖宗開泰元年見殿中高可恆

殿中丞

尙舍局見遼朝雜禮

奉御

尙乘局奉御

尙輦局奉御

尙食局奉御

尙衣局奉御

翰林院掌天子文翰之事

翰林都林牙興宗重熙十三年見翰林都林牙耶律庶成

南面林牙耶律磨魯古聖宗統和初爲南面林牙

翰林學士承旨趙延壽傳見翰林學士承旨張礪

翰林學士太宗大同元年見和凝爲翰林學士

翰林祭酒韓德崇景宗保寧初爲翰林祭酒

知制誥室昉太宗入汴詔知制誥

翰林畫院

翰林畫待詔聖宗開泰七年見翰林畫待詔陳升

翰林醫官天祚保大二年見提舉翰林醫官李顛

國史院

監修國史聖宗統和九年見監修國史室昉

史館學士景宗保寧八年見史館學士

史館修撰劉輝大安末爲史館修撰

修國史耶律玦重熙初修國史

宣政殿

宣政殿學士穆宗應曆元年見宣政殿學士李澣

觀書殿

觀書殿學士王鼎壽隆初爲觀書殿學士

昭文館

昭文館直學士楊遵勛子晦爲昭文館直學士

崇文館

崇文館大學士韓延徽太祖時爲崇文館大學士

乾文閣

乾文閣學士王觀道宗咸雍五年爲乾文閣學士

宣徽院太宗會同元年置

宣徽使

知宣徽院事馬得臣統和初知宣徽院事

宣徽副使

同知宣徽使事

同知宣徽院事

內省

內省使聖宗太平九年初見內省使

內省副使

內藏庫

內藏庫提點道宗清寧元年見內藏庫提點耶律烏骨

內侍省

黃門令

內謁者

內侍省押班

內侍左廂押班

內侍右廂押班



契丹漢兒渤海內侍都知

左承宣使

右承宣使

內庫

都提點內庫

尙衣庫

尙衣庫使

湯藥局

都提點勾當湯藥內侍省官並見王繼恩趙安仁傳

客省太宗會同元年置

都客省與宗重熙十年見都客省回鶻重哥

客省使會同五年見客省使耶律化哥

左客省使蕭護思應曆初爲左客省使

右客省使

客省副使

四方館

四方館使高勳太宗入汴爲四方館使

四方館副使趙宗咸雍五年詔四方館副使止以契丹人充

引進司

引進使聖宗統和二十八年見引進使韓杞

點簽司

同簽點簽司事興宗重熙六年見同簽點簽司事耶律圓寧

禮信司

勾當禮信司興宗重熙七年見勾當禮信司骨欲

禮賓使司

禮賓使大公鼎曾祖忠爲禮賓使

寺官職名總目

某卿與宗景福元年見崇祿卿李可封

某少卿耶律儼子處貞爲太常少卿

某丞

某主簿

太常寺有博士贊引太祝奉禮郎協律郎

諸署職名總目

某署令

某署丞

太樂署

鼓吹署

法物庫遼朝雜禮有法物庫所掌圖籍

法物庫使

法物庫副使

崇祿寺本光祿寺太宗諱改

衛尉寺

宗正寺職在大惕隱司

太僕寺有乘黃署

大理寺有提點大理寺有大理正聖宗統和十二年置

鴻臚寺

司農寺

諸監職名總目

某太監與宗景福元年見少府監馬憚

某少監與宗重熙十七年見將作少監王企

某監丞

某監主簿

秘書監有祕書郎祕書郎正字

著作局

著作郎

著作佐郎楊哲聖宗統和十一年爲著作佐郎

校書郎楊佶統和中爲校書郎

正字開泰元年見正字李萬

司天監有太史令有司曆靈臺郎挈壺正五官正丞主簿五官靈臺郎保章正  
司曆監候挈壺正司辰刻漏博士典鍾典鼓  
國子監上京國子監太祖置

祭酒

司業

監丞

主簿

國子學

博士武白為上京國子博士

助教

太府監

少府監

將作監

都水監

已上文官

諸衛職名總目

各衛

大將軍聖宗開泰七年見皇子宗簡右衛大將軍

上將軍王繼忠統和二十二年加左武衛上將軍

將軍聖宗太平四年見千牛衛將軍蕭順

折衝都尉

果毅都尉

親衛

勳衛

翊衛

左右衛

左右驍衛

左右武衛

左右威衛

左右領軍衛

左右金吾衛

左右監門衛

左右千牛衛

遼

左右羽林軍

左右龍虎軍

左右神武軍

左右神策軍

左右神威軍

已上武官

東宮三師府凡東宮官多見遼朝雜禮

太子太師太宗大同元年見太子太師李崧

太子太傅世宗天祿五年見太子太傅趙瑩

太子太保大同元年見太子太保趙瑩

太子少師聖宗太平十一年見太子少師蕭從順

太子少傅耶律合里重熙中爲太子少傅

太子少保大同元年見太子少保馮玉



太子賓客院

太子賓客

太子詹事院

太子詹事

少詹事

詹事丞

詹事主簿

太子司直司

太子司直

左春坊

太子左庶子

太子中允 聖宗太平五年見太子中允馮若谷

太子司議郎

太子左諭德

太子左贊善大夫

文學館

崇文館學士

崇文館直學士

太子校書郎聖宗太平五年見太子校書郎韓灤

司經局

太子洗馬劉輝大安末爲太子洗馬

太子文學

太子校書郎聖宗太平五年見太子校書郎張昱

太子正字

典設局

典設郎

宮門局

宮門郎

右春坊

太子右庶子

太子中舍人

太子舍人

太子右諭德

右贊善大夫

太子通事舍人

太子家令寺

太子家令

丞

主簿

太子率更寺

太子率更令

丞

主簿

太子僕寺

太子僕

丞

主簿

太子率府職名總目

某率興宗重熙十四年見率府率習羅

太子左右衛率府

太子左右司禦率府

太子左右清道率府

太子左右監門率府

太子左右內率府

已上東宮官

王傅府

王傅蕭惟信重熙十五年爲燕趙王傅

親王內史府

內史道宗太康三年見內史吳家奴

長史

參軍

諸王文學館

諸王教授姚景行重熙中爲燕趙國王教授

諸王伴讀聖宗太平八年長沙郡王宗允等奏選諸王伴讀

已上諸王府官

南面宮官

漢兒行宮都部署院亦曰南面行宮都部署司聖宗開泰九年改左僕射

漢兒行宮都部署開泰七年見漢兒行宮都部署石用中

漢兒行宮副部署興宗重熙十五年見漢兒行宮副部署耶律敵烈

知南面諸行宮副部署重熙十年見知南面諸行宮副部署耶律裏里

同知漢兒行宮都部署事道宗太康三年見同知漢兒行宮都部署事蕭

撻不也

同僉部署司事耶律儼太康中爲同簽部署司事

都部署判官耶律儼咸雍中爲都部署判官

十二宮南面行宮都部署司職名總目

某宮漢人行宮都部署

某宮南面副都部署

某宮同知漢人都部署

弘義宮

永興宮

積慶宮

長寧宮

延昌宮

彰愍宮

崇德宮

興聖宮

延慶宮

太和宮

永昌宮

敦睦宮

遼史卷四十七



遼史卷四十七考證

百官志三南面○

臣長發

按遼志有漢人樞密院中書省行宮都總管司謂之南面以其在牙帳之南以主漢事

遼史卷四十七考證

卷之五十五

宋史紀事本末

宋史紀事本末

宋史紀事本末

遼史卷四十八

元中書右丞丞相總裁脫脫等修

志第十七下

百官志四

南面京官

遼有五京上京爲皇都凡朝官京官皆有之餘四京隨宜設官爲制不一大抵西京多邊防官南京中京多財賦官五京並署者列陳之特置者分列于後  
三京宰相府職名總目

左相

右相

左平章政事

右平章政事

東京宰相府聖宗統和元年詔三京左右相左右平章事

中京宰相府

南京宰相府

諸京內省客省職名總目

某京某省使

某京某省副使耶律蒲奴開泰末爲上京內客省副使

上京內省司

東京內省司地理志東京大內不置宮嬪唯以內省使副判官守之

五京諸使職名總目

某京某使王棠重熙中爲上京鹽鐵使

知某京某使事張孝傑清寧間知戶部使事

某京某副使劉伸重熙中爲三司副使

同知某京某使事道宗太康三年見撻不也同知度支使事

某京某判官聖宗太平九年見戶部使判官

上京鹽鐵使司

東京戶部使司

中京度支使司

南京三司使司

南京轉運使司亦曰燕京轉運使司

西京計司

五京留守司兼府尹職名總目

某京留守行某府尹事聖宗統和元年見上京留守行臨潢尹事吳王稍

某京副留守天祚天慶六年見東京副留守高濤臣

知某京留守事蕭惠開泰二年知東京留守事

某府少尹聖宗太平四年見臨潢少尹鄭弘節

同知某京留守事太平八年見中京同知耶律野

同簽某京留守事蕭滴洌太平六年同簽南京留守事

某京留守判官室昉天祿中為南京留守判官

某京留守推官聖宗開泰元年見中京留守推官李可舉

上京留守司

東京留守司

中京留守司太宗大同元年命趙延壽為中京留守治鎮州聖宗統和十二年

命室昉為中京留守治大定府

南京留守司太宗天顯三年升東平郡為南京治遼陽十三年以幽州為南京

治析津聖宗開泰元年改幽都府為析津府

西京留守司

五京都總管府職名總目

某京都總管知某府事

同知某府事聖宗太平五年見同知中京事蕭堯衰

上京都總管府

東京都總管府

中京都總管府

南京都總管府

西京都總管府

五京都虞候司職名總目

都虞候

上京都虞候司

東京都虞候司

南京都虞候司

西京都虞候司

中京都虞候司

五京警巡院職名總目

某京警巡使

某京警巡副使

上京警巡院

東京警巡院

中京警巡院

南京警巡院

西京警巡院

五京處置使司職名總目

某京處置使

上京處置司

東京處置司

中京處置司

西京處置司

南京處置司



五京學職名總目道宗清寧五年詔設學養士頒經及傳疏置博士助教各一員

博士

助教

上京學上京別有國子監見朝官

東京學

中京學中京別有國子監與朝官同

南京學亦曰南京太學太宗置聖宗統和十三年賜水磴莊一區

西京學

已上五京官

上京城隍使司亦曰上京皇城使

上京城隍使韓德讓景宗時爲上京城隍使

東京渤海承奉官聖宗開泰八年耶律八哥奏渤海承奉班宜設官以統之因

置

渤海承奉都知押班

遼陽大都督府太宗會同二年置

遼陽大都督會同二年都督曷魯泊等關防遼陽東都

東京安撫使司

東京安撫使

東京軍巡院地理志東京有歸化營軍千餘人籍河朔亡命於此置軍巡院

東京軍巡使

中京文思院

中京文思使馬人望父侄爲中京文思使

中京路按問使司

中京路按問使耶律和尚重熙二十四年爲中京路按問使

中京巡邏使司

中京巡邏使耶律古昱開泰間爲中京巡邏使

中京大內都部署司

中京大內都部署聖宗開泰元年見中京大內都部署

中京大內副部署

南京宣徽院

南京宣徽使道宗壽隆元年見宣徽使耶律特末

知南京宣徽院使事

知南京宣徽院事

南宣徽副使

同知南京宣徽院事

南京處置使司聖宗開泰元年見秦王隆慶爲燕京管內處置使

燕京管內處置使

南京侍衛親軍馬步軍都指揮使司

南京侍衛親軍馬步軍都指揮使蕭討古乾亨初為南京侍衛親軍都指

揮使

南京馬步副指揮使

南京侍衛親軍馬軍都指揮使司

南京馬軍都指揮使

南京馬軍副指揮使

南京侍衛親軍步軍都指揮使司

南京步軍都指揮使

南京步軍副指揮使

南京栗園司

典南京栗園

雲州宣諭招撫使司

雲州管內宣諭招撫使二員統和四年見韓毗哥邢抱質為雲州管內宣

諭招撫使

南面大蕃府官

黃龍府

知黃龍府事與宗重熙十三年見知黃龍府事耶律甌里斯

同知黃龍府事

黃龍府判官

黃龍府侍衛親軍馬步軍都指揮使

黃龍府侍衛親軍都指揮使

黃龍府侍衛親軍副指揮使

黃龍府侍衛馬軍都指揮使

黃龍府侍衛步軍都指揮使

黃龍府侍衛馬軍副指揮使

黃龍府侍衛步軍副指揮使

黃龍府學

博士

助教

興中府

知興中府事咸雍元年知興中府事楊績

同知興中府事

興中府判官

興中府學

博士

助教

南面方州官

遼東西燕秦漢唐已置郡縣設官職矣高麗渤海因之至遼五京列峙包括燕代悉為畿甸二百餘年城郭相望田野益闢冠以節度承以觀察防禦團練等

使分以刺史縣令大略採用唐制其間宗室外戚大臣之家築城賜額謂之頭下州軍唯節度使朝廷命之後往往皆歸王府不能州者謂之軍不能縣者謂之城不能城者謂之堡其設官則未詳云

節度使職名總目

某州某軍節度使

某州某軍節度副使

同知節度使事耶律玦重熙中同知遼興軍節度使事

行軍司馬

軍事判官

掌書記劉伸重熙五年爲彰武軍節度使掌書記

衙官

某馬步軍都指揮使司

都指揮使

副指揮使

某馬軍指揮使司

指揮使

副指揮使

某步軍指揮使司

指揮使

副指揮使

上京道

懷州奉陵軍節度使司

慶州玄寧軍節度使司

泰州德昌軍節度使司

長春州韶陽軍節度使司

儀坤州啓聖軍節度使司



龍化州興國軍節度使司

饒州匡義軍節度使司

徽州宣德軍節度使司

成州長慶軍節度使司

懿州廣順軍節度使司

渭州高陽軍節度使司

鎮州建安軍節度使司

東京道

開州鎮國軍節度使司

保州宣義軍節度使司

辰州奉國軍節度使司

興州中興軍節度使司

海州南海軍節度使司

涿州鴨綠軍節度使司

顯州奉先軍節度使司

乾州廣德軍節度使司

貴德州寧遠軍節度使司

瀋州昭德軍節度使司

遼州始平軍節度使司

通州安遠軍節度使司

雙州保安軍節度使司

同州鎮安軍節度使司

咸州安東軍節度使司

信州彰聖軍節度使司

賓州懷化軍節度使司

懿州寧昌軍節度使司

蘇州安復軍節度使司

復州懷德軍節度使司

祥州瑞聖軍節度使司

中京道

成州興府軍節度使司

興中府彰武軍節度使司

宜州崇義軍節度使司

錦州臨海軍節度使司

川州長寧軍節度使司

建州保靜軍節度使司

來州歸德軍節度使司

南京道

幽州盧龍軍節度使司

平州遼興軍節度使司

西京道

雲中大同軍節度使司

雲內州開軍節度使司

奉聖州武定軍節度使司

蔚州忠順軍節度使司

應州彰國軍節度使司

朔州順義軍節度使司

觀察使職名總目

某州軍觀察使

某州軍觀察副使

某州軍觀察判官王鼎清寧五年爲易州觀察判官

州學

博士

助教

中京道

高州觀察使司

武安州觀察使司

利州觀察使司

東京道

益州觀察使司

寧州觀察使司

歸州觀察使司

寧江州混同軍觀察使司

上京道

永州永昌軍觀察使司

靜州觀察使司

團練使司職名總目

某州團練使

某州團練副使

某州團練判官

州學

博士

助教

東京道

安州團練使

防禦使司職名總目

某州防禦使

某州防禦副使

某州防禦判官

州學

博士

助教

東京道

廣州防禦使司

鎮海府防禦使司

冀州防禦使司

衍州安廣軍防禦使司

州刺史職名總目

某州刺史

某州同知州事耶律獨攬重熙中同知金肅軍事

某州錄事參軍世宗天祿五年詔州錄事參軍委政事省差注

州學

博士

助教

上京道五州烏降聖維防招

東京道三十七州穆賀盧鐵崇耀嬪遼西康宗海北巖集祺遂韓銀安遠威清

雍湖渤郅銅涑率賓定理鐵利吉麓荆勝順化連肅烏

中京道十三州恩惠榆澤北安潭松山安德黔巖濕遷潤

南京道八州順檀涿易薊景灤營

西京道八州弘德寧邊歸化可汗儒武東勝

縣職名總目

某縣令

某縣丞

某縣主簿世宗天祿五年詔縣主簿政事省差注



某縣尉

縣學太公鼎爲良鄉縣尹建孔子廟

博士

助教

五京諸州屬縣見地理志縣有驛遞馬牛旗鼓鄉正廳隸倉司等役有破產不能給者良民患之馬人望設法使民出錢免役官自募人倉司給使以公使充人以爲便

南面分司官

平理庶獄採撫民隱漢唐以來賢主以爲恤民之令典官不常設有詔則選材望官爲之

分決諸道滯獄使聖宗統和九年命邢抱朴等五員又命馬守瑛等三員分決諸道滯獄

按察諸道刑獄使開泰五年遣劉涇等分路按察刑獄採訪使太宗會同三年

命于骨鄰爲採訪使

南面財賦官

遼國以畜牧田漁爲稼穡財賦之官初甚簡易自涅里教耕織而後鹽鐵諸利日以滋殖既得燕代益富饒矣

諸錢帛司職名職目

某州錢帛都點檢大公鼎爲長春州錢帛都提點

長春路錢帛司與宗重熙二十二年置

遼西路錢帛司

平州路錢帛司

轉運司職名總目

某轉運使

某轉運副使

同知某轉運使

某轉運判官

山西路都轉運使司楊哲與宗重熙二十年爲山西轉運使

奉聖州轉運使司聖宗開泰二年置

蔚州轉運使司

應州轉運使司

朔州轉運使司

保州轉運使司已上並開泰三年置

西山轉運使聖宗太平三年見西山轉運使郎玄化

南面軍官

傳曰雖楚有材晉實用之遼自太祖以來攻掠五代宋境得其人則就用之東北二鄙以農以工有事則從軍政計之善者也

點檢司職名總目

某都點檢穆宗十三年見殿前都點檢耶律夷刺葛

某副點檢聖宗太平六年見副點檢耶律野

同知某都點檢道宗清寧九年見同知點檢司事耶律撻不也

點檢司

殿前都點檢司

點檢侍衛親軍馬步司

諸指揮使司職名總目

某軍都指揮使聖宗統和二年見侍衛親軍都指揮使韓倬

某軍副指揮使

某軍都監

某軍都指揮使司

某軍副指揮使司

並同前

侍衛親軍馬步軍都指揮使司

侍衛親軍馬軍都指揮使司

侍衛親軍步軍都指揮使司

侍衛控鶴兵馬都指揮使司

侍衛漢軍兵馬都指揮使司

四軍兵馬都指揮使司

歸聖軍兵馬都指揮使司聖宗統和五年以宋降軍置七指揮署左右廂凡四十二員七年隸總管府

歸聖軍左廂兵馬都指揮使司

歸聖軍右廂兵馬都指揮使司

第一左廂兵馬都指揮使司

第一右廂兵馬都指揮使司

第二左廂兵馬都指揮使司

第二右廂兵馬都指揮使司

第三左廂兵馬都指揮使司

第三右廂兵馬都指揮使司

第四左廂兵馬都指揮使司

第四右廂兵馬都指揮使司

第五左廂兵馬都指揮使司

第五右廂兵馬都指揮使司

第六左廂兵馬都指揮使司

第六右廂兵馬都指揮使司

第七左廂兵馬都指揮使司

第七右廂兵馬都指揮使司

宣力軍都指揮使司

四捷軍都指揮使司

天聖軍都指揮使司

漢軍都指揮使司

諸軍都團練使職名總目

某軍都團練使趙思溫太祖神冊二年爲漢軍都團練使

某軍團練副使

某軍團練判官

漢軍都團練使司

諸軍兵馬都總管府職名總目

某兵馬都總管聖宗太平四年見兵馬都總管

某兵馬副總管

同知某兵馬事

某兵馬判官

兵馬都總管府

歸聖軍兵馬都總管府

南面邊防官

三皇五帝寬柔之化澤及漢唐好生惡殺習與性成雖五代極亂習於戰鬪者才幾人耳宋以文勝然遼之邊防猶重於南面直以其地大民衆故耳卒之親仁善鄰桴鼓不鳴幾二百年此遼之所以爲美也歟

易州飛狐招安使聖宗統和二十三年改安撫使司

易州飛狐兵馬司道宗咸雍四年改易州安撫司

易州飛狐招撫司

西南面招安使司耶律合住景宗保寧初爲西南面招安使

巡檢使司耶律合住景宗保寧中爲巡檢使

五州都總管府耶律速撒穆宗應曆初爲義霸祥順聖五州都總管

山後五州都管司聖宗統和四年見蒲奴寧爲山後五州都管

五州制置使司聖宗開泰九年見霸建宜泉錦五州制置使

三州處置使司韓德樞太宗時爲平灤營三州處置使



霸州處置使司統和二十七年廢

遼史卷四十八

遼

史

卷四十八

志

共  
中華書局聚



遼史卷四十九

元中書右丞相總裁脫脫等修

志第十八

禮志一

理自天設情絲人生以理制情而禮樂之用行焉林豺梁獺是生郊禘窪尊燔黍是生燕饗蒸裡瓦棺是生喪葬儷皮緇布是生婚冠皇造帝秩三王彌文一文一質蓋本于忠變通革弊與時宜之唯聖人爲能通其意執理者膠瑟聚訟不適人情徇情者稊稗綿蕪不中天理秦漢而降君子無取焉遼本朝鮮故壤箕子八條之教流風遺俗蓋有存者自其上世緣情制宜隱然有尙質之風遙輦胡刺可汗制祭山儀蘇可汗制瑟瑟儀阻午可汗制柴冊再生儀其情朴其用儉敬天恤災施惠本孝出於悃忱殆有得於膠瑟聚訟之表者太古之上椎輪五禮何以異茲太宗克晉稍用漢禮今國史院有金陳大任遼禮儀志皆其國俗之故又有遼朝雜禮漢儀爲多別得宣文閣所藏耶律儼志視大任爲加

詳存其略著于篇

吉儀

祭山儀設天神地祇位于木葉山東鄉中立君樹前植羣樹以像朝班又偶植二樹以爲神門皇帝皇后至夷離畢具禮儀牲用赭白馬玄牛赤白羊皆牡僕臣曰旗鼓拽刺殺牲體割懸之君樹太巫以酒酌牲禮官曰敵烈麻都奏儀辦皇帝服金文金冠白綾袍絳帶懸魚三山絳垂飾犀玉刀錯絡縫烏靴皇后御絳帔絡縫紅袍懸玉佩雙結帕絡縫烏靴皇帝皇后御鞍馬羣臣在南命婦在北服從各部旗幟之色以從皇帝皇后至君樹前下馬升南壇御榻坐羣臣命婦分班以次入就位合班拜訖復位皇帝皇后詣天神地祇位致奠闔門使讀祝訖復位坐北府宰相及惕隱以次致奠于君樹徧及羣樹樂作羣臣命婦退皇帝率孟父仲父季父之族三匝神門樹餘族七匝皇帝皇后再拜在位者皆再拜上香再拜如初皇帝皇后升壇御龍文方茵坐再聲警詣祭東所羣臣命婦從班列如初巫衣白衣惕隱以素巾拜而冠之巫

三致辭每致辭皇帝皇后一拜在位者皆一拜皇帝皇后各舉酒二爵肉二器再奠大臣命婦右持酒左持肉各一器少後立一奠命惕隱東向擲之皇帝皇后六拜在位者皆六拜皇帝皇后復位坐命中丞奉茶果餅餌各二器奠于天神地祇位執事郎君二十人持福酒胙肉詣皇帝皇后前太巫奠酌訖皇帝皇后再拜在位者皆再拜皇帝皇后一拜飲福受胙復位坐在位者以次飲皇帝皇后率羣臣復班位再拜聲蹕一拜退

太祖幸幽州大悲閣遷白衣觀音像建廟木葉山尊爲家神於拜山儀過樹之後增詣菩薩堂儀一節然後拜神非胡刺可汗之故也與宗先有事于菩薩堂及木葉山遼河神然後行拜山儀冠服節文多所變更後因爲常神主樹木懸牲告辦班位奠祝致嘏飲福往往暗合于禮天理人情放諸四海而準信矣夫興宗更制不能正以經術無以大過於昔故不載瑟瑟儀若旱擇吉日行瑟瑟儀以祈雨前期置百柱天棚及期皇帝致奠于先帝御容乃射柳皇帝再射親王宰執以次各一射中柳者質誌柳者冠服不

中者以冠服質之不勝者進飲於勝者然後各歸其冠服又翼日植柳天棚之東南巫以酒醴黍稷薦植柳祝之皇帝皇后祭東方畢子弟射柳皇族國舅羣臣與禮者賜物有差既三日雨則賜敵烈麻都馬四疋衣四襲否則以水沃之

道宗清寧元年皇帝射柳訖詣風師壇再拜

柴冊儀擇吉日前期置柴冊殿及壇壇之制厚積薪以木爲三級壇置其上席百尺氈龍文方茵又置再生母后搜索之室皇帝入再生室行再生儀畢八部之叟前導後扈左右扶翼皇帝冊殿之東北隅拜日畢乘馬選外戚之老者御皇帝疾馳仆御者從者以氈覆之皇帝詣高阜地大臣諸部帥列儀仗遙望以拜皇帝遣使勅曰先帝升遐有伯叔父兄在當選賢者冲人不德何以爲謀羣臣對曰臣等以先帝厚恩陛下明德咸願盡心敢有他圖皇帝令曰必從汝等所願我將信明賞罰爾有功陟而任之爾有罪黜而棄之若聽朕命則當謨之僉曰唯帝命是從皇帝于所識之地封土石以誌之遂行拜

先帝御容宴饗羣臣翼日皇帝出冊殿護衛太保扶翼升壇奉七廟神主置龍文方茵北南府宰相率羣臣圍立各舉盃邊贊祝訖樞密使奉玉寶玉冊入有司讀冊訖樞密使稱尊號以進羣臣三稱萬歲皆拜宰相北南院大王諸部帥進赭白羊各一羣皇帝更衣拜諸帝御容遂宴羣臣賜賚各有差

拜日儀皇帝升露臺設褥向日再拜上香門使通閣使或副應拜臣僚殿左右階陪位再拜皇帝昇坐奏榜訖北班起居畢時相已下通名再拜不出班奏聖躬萬福又再拜各祇候宣徽已下橫班同諸司閣門北面先奏事餘同教坊與臣僚同

告廟儀至日臣僚昧爽朝服詣太祖廟次引臣僚合班先見御容再拜畢引班首左上至褥位再拜贊上香楫欄內上香畢復褥位再拜各祇候立定左右舉告廟祝版於御容前跪捧中書舍人俛跪讀訖俛興退引班首左下復位又再拜分引上殿次第進酒三分班引出

謁廟儀至日味爽南北臣僚各具朝服赴廟車駕至臣僚於門外依位序立望

駕鞠躬班首不出班奏聖躬萬福舍人贊各祇候畢皇帝降車分引南北臣僚左右入至丹墀褥位合班定皇帝升露臺褥位宣徽贊皇帝再拜殿上下臣僚陪位皆再拜上香畢退復位再拜分引臣僚左右上殿位立進御容酒依常禮若卽退再拜舍人贊好去引退禮畢

告廟謁廟皆曰拜容以先帝先后生辰及忌辰行禮自太宗始也其後正旦皇帝生辰諸節辰皆行之若忌辰及車駕行幸亦嘗遣使行禮凡瑟瑟柴冊再生納后則親行之凡柴冊親征則告幸諸京則謁四時有薦新

孟冬朔拜陵儀有司設酒饌于山陵皇帝皇后駕至敵烈麻都奏儀辦閣門使贊皇帝皇后詣位四拜訖巫贊祝燔胙及時服酌酒薦牲大臣命婦以次燔胙四拜皇帝皇后率羣臣命婦循諸陵各三匝還宮翼日羣臣入謝

燕節儀皇帝卽位凡征伐叛國俘掠人民或臣下進獻人口或犯罪沒官戶皇帝親覽闕田建州縣以居之設官治其事及帝崩所置人戶府庫錢粟穹廬中置小氈殿帝及后妃皆鑄金像納焉節辰忌日朔望皆致祭于穹廬之前



又築土爲臺高丈餘置大盤于上祭酒食撒於其中焚之國俗謂之燕節  
歲除儀初夕勅使及夷离畢率執事郎君至殿前以鹽及羊膏置爐中燎之巫  
及大巫以次贊祝火神訖閣門使贊皇帝面火再拜

初皇帝皆親拜至道宗始命夷离畢拜之

遼史卷四十九



遼史卷五十

元中書右丞相總裁脫脫等修

志第十九

禮志二

凶儀

喪葬儀聖宗崩興宗哭臨于鼓塗殿大行之夕四鼓終皇帝率羣臣入柩前三致奠奉柩出殿之西北門就輜輶車藉以素裯巫者祓除之詰旦發引至祭所凡五致奠太巫祈禳皇族外戚大臣諸京官以次致祭乃以衣弓矢鞍勒圖畫馬輓儀衛等物皆燔之至山陵葬畢上哀冊皇帝御幄命改火面火致奠三拜又東向再拜天地訖乘馬率送葬者過神門之木乃下東向又再拜翼日詰旦率羣臣命婦詣山陵行初奠之禮升御容殿受遺賜又翼日再奠如初興宗崩道宗親擇地以葬道宗崩鼓塗于遊仙殿有司奉喪服天祚皇帝問禮于總知翰林院事耶律固始服斬衰皇族外戚使相矮敦官及郎君

服如之餘官及承應人皆白桌衣巾以入哭臨惕隱三父房南府宰相遙輦常袞九奚首郎君夷离畢國舅詳穩十聞撒郎君南院大王郎君各以次薦奠進鞍馬衣襲握玉帶等物表列其數讀訖焚表諸國所賻器服親王諸京留守奠祭進賻物亦如之先帝小斂前一日皇帝喪服上香奠酒哭臨其夜北院樞密使契丹行宮都部署入小斂翼日遣北院樞密副使林牙以所賻器服置之幽宮靈柩升車親王推之至食穀之次蓋遼國舊俗於此刑殺羊以祭皇族外戚諸京州官以次致祭至葬所靈柩降車就轡皇帝免喪服步引至長福岡是夕皇帝入陵寢授遺物于皇族外戚及諸大臣乃出命以先帝寢幄過於陵前神門之木帝不親往遣近侍冠服赴之初奠皇帝皇后率皇族外戚使相節度使夫人以上命婦皆拜祭循陵三匝而降再奠如初辭陵而還

上謚冊儀先一日於葢塗殿西廊設御幄并臣僚幕次大樂令展宮懸於殿庭協律郎設舉麾位至日北南面臣僚朝服昧爽赴葢塗殿先置冊寶案于西

廊下閣使引皇帝至御幄服寬衣皂帶臣僚班齊分班引入饗殿合班立定引冊案上殿至禔位寶案次之設於西階閣使引皇帝自西階升殿初行樂作至位立樂止宣徽使揖皇帝鞠躬再拜陪位者皆再拜翰林使執臺璣以進皇帝再拜引至神座前跪奠三樂作進奠訖復位樂止又再拜陪位者皆再拜引皇帝于神座前北面立捧冊函者去蓋進前跪冊案退置殿西壁下引讀冊者進前俛伏跪自通全銜臣讀謚冊讀訖俛伏興復位捧冊函者置于案上捧寶函者進前跪讀寶官通銜跪讀訖引皇帝至禔位再拜陪位者皆再拜禮畢引皇帝歸御幄初行樂作至御幄樂止引臣僚分班出若皇太后奠酒依常儀

忌辰儀先一日奏忌辰榜子預寫名紙大紙一幅用陰面後第三行書文武百僚宰臣某以下謹詣西上閣門進名奉慰至日應拜大小臣僚並皂衣皂鞋帶四鼓至時於幕次前在京於僧寺班齊依位望闕敘立直日舍人跪右執名紙在前班首以下皆再拜引退名紙於宣徽使面付內侍奏聞

宋使祭奠弔慰儀太皇太后至葦塗殿服喪服太后於北間南面垂簾坐皇帝於南間北面坐宋使至幕次宣賜素服皂帶更衣訖引南北臣僚入班立定可矮敦以下並上殿依位立先引祭奠使副捧祭文南洞門入殿上下臣僚並舉哀至丹墀立定西上閣門使自南階下受祭文上殿啓封置於香案哭止祭奠禮物列殿前引使副南階上殿至褥位立揖再拜引大使近前上香退再拜大使近前跪捧臺瓊進奠酒三教坊奏樂退再拜揖中書二舍人跪捧祭文引大使近前俛伏跪讀訖舉哀引使副下殿立定哭止禮物擔牀出畢引使副近南面北立勾弔慰使副南洞門入四使同見大行皇帝靈再拜引出歸幕次皇太后別殿坐服喪服先引北南面臣僚並於殿上下依位立弔慰使副捧書匣右入當殿立閣門使右下殿受書匣上殿奏封全開讀訖引使副南階上殿傳達弔慰訖退下殿立引禮物擔牀過畢引使副近南北面立勾祭奠使副入四使同見鞠躬再拜不出班奏聖躬萬福再拜出班謝面天顏又再拜立定宣徽傳聖旨撫問就位謝再拜引出歸幕次皇帝御南

殿服喪服使副入見如見皇太后儀加謝遠接撫問湯藥再拜次宣賜使副并從人祭奠使副別賜讀祭文例物卽日就館賜宴高麗夏國奉弔進賻等使禮略如之道宗崩天祚皇帝問禮于耶律固宋國遣使弔及致祭歸贈皇帝喪服御游仙之北別殿使入門皇帝哭使者詣柩前上香讀祭文訖又哭有司讀遺詔慟哭使者出少頃復入陳賻贈于柩前皇帝入臨哭退更衣御游仙殿南之幄殿使者入見且辭勅有司賜宴於館

宋使告哀儀皇帝素冠服臣僚皂袍鞋帶宋使奉書右入丹墀內立西上閣門使右階下殿受書匣上殿欄內鞠躬奏封全開封於殿西案授宰相讀訖皇帝舉哀舍人引使者右階上欄內俛跪附奏起居訖俛興立皇帝宣問南朝皇帝聖躬萬福使者跪奏來時皇帝聖躬萬福起退舍人引使者右階下殿於丹墀西面東鞠躬通事舍人通使者名某祇候見再拜不出班奏聖躬萬福再拜出班謝面天顏再拜又出班謝遠接撫問湯藥再拜贊祇候引出就幕次宣賜衣物引從人入通名拜奏聖躬萬福出就幕賜衣如使者之儀又

引使者入面殿鞠躬贊謝恩再贊有勅賜宴再拜贊祇候出就幕次宴引從人謝恩拜勅賜宴皆如初宴畢歸館

宋使進遺留禮物儀百官昧爽朝服殿前班立宋遺留使告登位使副入內門館伴副使引謝登位使就幕次坐館伴大使與遺留使副奉書入至西上閣門外氈位立閣使受書匣置殿西階下案引進使引遺留物於西上閣門入卽於廊下橫門出皇帝升殿坐宣徽使押殿前班起居畢引宰臣押文武班起居引中書令西階上殿奏宋使見膀子契丹臣僚起居控鶴官起居遺留使副西上閣門入面殿立舍人引使副西階上殿附奏起居訖引西階下殿於丹墀東西面鞠躬通名奏聖躬萬福如告哀使之儀謝面天顏謝遠接撫問湯藥引遺留使從人見亦如之次引告登位使副奉書匣於東上閣門入面殿立閣使東階下殿受書匣中書令讀訖舍人引使副東階上殿附奏起居引下殿南面立告登位禮物入卽於廊下橫門出退西面鞠躬附奏起居謝面天顏遠接等皆如遺留使之儀宣賜遺留登位兩使副併從人衣物如



告哀使應坐臣僚皆上殿就位立分引兩使副等於兩廊立皇帝問使副衝涉不易丹墀內五拜各引上殿祇候位立大臣進酒皇帝飲酒契丹通漢人贊殿上臣僚皆拜稱萬歲贊各就坐行酒殺茶饜頭畢從人出水飯畢臣僚皆起契丹通漢人贊皆再拜稱萬歲各祇候獨引宋使副下殿謝五拜引出控鶴官門外祇候報閣門無事供奉官捲班出

高麗夏國告終儀先期於行宮左右下御帳設使客幕次於東南至日北面臣僚各常服其餘臣僚並朝服入朝使者至幕次有司以嗣子表狀先呈樞密院准備奏呈先引北面臣僚并矮敦已上近御帳相對立其餘臣僚依班位序立引告終人使右入至丹墀面殿立引右上立揖少前拜跪奏訖宣問若嗣子已立恭身受聖旨奏訖復位嗣子未立不宣問引右下丹墀面北鞠躬通班畢引面殿再拜不出班奏聖躬萬福再拜出班謝面天顏復位再拜出班謝遠接復位再拜贊祇候退就幕次再入依前面北鞠躬通辭再拜敘戀闕再拜贊好去禮畢

遼史卷五十

[The text in this section is extremely faint and largely illegible due to fading or bleed-through from the reverse side of the page. It appears to consist of several columns of vertical text.]

遼史卷五十一

元中書右丞相總裁脫脫等修

志第二十

禮志三

軍儀

皇帝親征儀常以秋冬應敵制變或無時將出師必先告廟乃立三神主祭之  
曰先帝曰道路曰軍旅刑青牛白馬以祭天地其祭常依獨樹無獨樹卽所  
舍而行之或皇帝服介冑祭諸先帝宮廟乃閱兵將行牝牡麋各一爲禩祭  
將臨敵結馬尾祈拜天地而後入下城克敵祭天地牲以白黑羊班師以所  
獲牡馬牛各一祭天地出師以死囚還師以一諜者植柱縛其上于所向之  
方亂射之矢集如蝟謂之射鬼箭

臘儀臘十二月辰日前期一日詔司獵官選獵地其日皇帝皇后焚香拜日畢  
設圍命獵夫張左右翼司獵官奏成列皇帝皇后升輦敵烈麻都以酒二尊

盤飧奉進北南院大王以下進馬及衣皇帝降輿祭東畢乘馬入圍中皇太子親王率羣官進酒分兩翼而行皇帝始獲兔羣臣進酒上壽各賜以酒至中食之次親王大臣各進所獲及酒訖賜羣臣飲還宮應曆元年冬漢遣使來賀自是遂以爲常儀統和中罷之

出軍儀制見兵志

禮志四

賓儀

常朝起居儀昧爽臣僚朝服入朝各依幕次內侍奏班齊先引京官班於三門外當直舍人放起居再拜各祇候次依兩府以下文武官於丹墀內面殿立暨班諸司并供奉官於東西道外相向立定當直閣使副贊放起居再拜各祇候退還幕次公服帝升殿坐兩府并京官丹墀內聲喏各祇候教坊司同北班起居畢奏事

燕京嘉寧殿西京同文殿朝服幘頭袍笏公服紫衫帽

正座儀皇帝升殿坐警聲絕契丹漢人殿前班畢各依位侍立次教坊班畢捲退京官班入拜畢揖於右橫街西依位班立次武班入拜畢依位立文班入拜畢依位立北班入起居畢於左橫街東序班立次兩府班入鞠躬通宰臣某官已下起居拜畢引上殿奏事

已上六班起居並七拜內有不帶節度使班首止通名亦七拜捲班與常朝同直院有旨入文班留守司三司統軍司制置司謂之京官都部署司宮使副宮使都承以下令史北面主事以下隨駕諸司爲武官館閣大理寺堂後以下御史臺隨駕閑員令史司天臺翰林醫官院爲文官

天慶二年冬教坊並服袍

臣僚接見儀皇帝御座奏見膀子畢臣僚左入鞠躬通文武百僚宰臣某官以下祇候見引面殿鞠躬起居凡七拜引班首出班謝面天顏復位舞蹈五拜鞠躬宣答問制再拜宣訖謝宣諭五拜各祇候畢可矮敦以上引近前問聖躬萬福傳宣問跋涉不易鞠躬引班舍人贊各祇候畢引右上准備宣問其

餘臣僚並於右侍立

宣答云卿等久居鄉邑來奉乘輿時屬霜寒或云炎蒸諒多勞止卿各平安好想宜知悉

問聖體儀皇帝行幸車駕至捺鉢坐御帳臣僚公服問聖躬萬福贊再拜各祇候奏事宜徽以下常服教坊與臣僚同

保大元年夏特旨通名再拜不稱宰臣

車駕還京儀前期一日宣徽以下橫班諸司閣門並公服於宿帳祇候至日詰旦皇帝乘玉輅閣門宣諭軍民訖導駕時相以下進至內門閣副勘前畢通事舍人鞠躬奏臣宣放仗禮畢

勘箭儀皇帝乘玉輅至內門北南臣僚於輅前對班立場箭官執雌箭門中立東上閣門使詣車前執雄箭在車左立勾勘箭官進勘箭官揖進至車約五部面車立閣使言受箭行勘勘箭官拜跪受箭舉手勘訖鞠躬奏內外勘同閣使言准勅行勘勘箭官平立退至門中舊位立當躬執箭贊軍將門仗官

近前門使官應聲開門舉聲兩邊齊出並列左右立勘箭官舉右手贊呈箭次贊內出喚仗御箭一隻准勅付左金吾仗行勘贊合不合應合合贊同不同應同同訖勘箭官再進依位立鞠躬自通全銜臣某對御勘箭同退門中立贊其箭謹付閣門使進入事畢其箭授閣使轉付宣徽

宋使見皇太后儀宋使賀生辰正旦至日臣僚昧爽入朝使者至幕次臣僚班齊皇太后御殿坐宣徽使押殿前班起居畢捲班次契丹臣僚班起居畢引應坐臣僚上殿就位立其餘臣僚不應坐者退於東面侍立漢人臣僚東洞門入面西鞠躬舍人鞠躬通某以下起居凡七拜畢贊各祇候引應坐臣僚上殿就位立中書令大王西階上殿奏宋使并從人膀子訖就位立其餘臣僚不應坐者退於西面侍立次引宋使副六人於東洞門入丹墀內面殿齊立閣使自東階下受書匣使人捧書匣者皆跪閣使搢笏立受書匣自東階上殿欄內鞠躬奏封全訖授樞密開封宰臣對皇太后讀訖引使副六人東階上殿欄內立使者揖生辰節大使少前使者俛伏跪附起居訖起復位立

次引賀皇太后正旦大使附起居如前儀皇太后宣問南朝皇帝聖躬萬福舍人揖生辰大使并皇太后正旦大使少前皆跪唯生辰大使奏來時聖躬萬福皆俛伏興引東階下殿丹墀內面殿齊立引進使引禮物於西洞門入殿前置擔牀控鶴官起居四拜擔牀於東便門出畢揖使副退於東方西面皆鞠躬舍人鞠躬通南朝國信使某官某以下祇候見舞蹈五拜畢不出班奏聖躬萬福再拜揖班首出班謝面天顏訖復位舞蹈五拜畢贊各上殿祇候引各使副西階上殿就位勾從人兩洞門入面殿鞠躬通名贊拜起居四拜畢贊各祇候分班引兩洞門出若宣問使副跋涉不易引西階下殿丹墀內舞蹈五拜畢贊各上殿祇候引西階上殿就位立契丹舍人漢人閣使齊贊拜應坐臣僚并使副皆拜稱萬歲贊各就坐行湯行茶供過人出殿門揖臣僚并使副起鞠躬契丹舍人漢人閣使齊贊皆拜稱萬歲贊各祇候先引

宋使副西階下殿西洞門出次揖臣僚出畢報閣門無事皇太后起

宋使見皇帝儀宋使賀生辰正旦至日臣僚味爽入朝使者至幕次奏班齊聲



警皇帝升殿坐宣徽使押殿前班起居畢捲班出契丹臣僚班起居畢引應坐臣僚上殿就位立其餘臣僚不應坐者並退於北面侍立次引漢人臣僚北洞門入面殿鞠躬舍人鞠躬通某官某以下起居皆七拜畢引應坐臣僚上殿就位立引首相南階上殿奏宋使并從人膀子就位立臣僚並退於南面侍立教坊入起居畢引南使副北洞門入丹墀內面殿立閣使北階下殿受書匣使人捧書匣者跪閣使搢笏立受於北階上殿欄內鞠躬奏封全訖授樞密開封宰相對皇帝讀訖舍人引使副北階上殿欄內立揖生辰大使少前俛伏跪附起居俛伏興復位立大使俛伏跪奏訖俛伏興退引北階下殿揖使副北方南面鞠躬舍人鞠躬通南朝國信使某官某以下祇候見起居七拜畢揖班首出班謝面天顏舞蹈五拜畢出班謝遠接御筵撫問湯藥舞蹈五拜畢贊各祇候引出歸幕次閣使傳宣賜對衣金帶勾從人以下入見舍人贊班首姓名以下再拜不出班奏聖躬萬福贊再拜稱萬歲贊各祇候引出舍人傳宣賜衣使副并從人服賜衣畢舍人引使副入丹墀內面殿

鞠躬舍人贊謝恩拜舞蹈五拜畢贊上殿祇候引使副南階上殿就位立勾  
從人入贊謝恩拜稱萬歲贊有勅賜宴再拜稱萬歲贊各祇候承受官引北  
廊下立御牀入大臣進酒皇帝飲酒契丹舍人漢人閣使齊贊拜應坐并侍  
立臣僚皆拜稱萬歲贊各祇候卒飲贊拜應坐臣僚皆拜稱萬歲贊各就坐  
行酒親王使相使副共樂曲若宣令飲盡並起立飲訖放瓊就位謝贊拜並  
隨拜稱萬歲贊各就坐次行方茵地坐臣僚等官酒若宣令飲盡贊謝如初  
殿上酒一行畢贊廊下從人拜稱萬歲贊各就坐若傳宣令飲盡並拜稱萬  
歲贊各就坐殿上酒三行行茶行殺行膳酒五行候曲終揖廊下從人起贊  
拜稱萬歲贊各祇候引出曲破臣僚并使副並起鞠躬贊拜應坐臣僚并使  
副皆拜稱萬歲贊各祇候引使副南階下殿丹墀內舞蹈五拜畢贊各祇候  
引出次引衆臣僚下殿出畢報閣門無事皇帝起聲蹕

曲宴宋使儀味爽臣僚入朝宋使至幕次皇帝升殿殿前教坊契丹文武班皆  
如初見之儀宋使副綴翰林學士班東洞門入面西鞠躬舍人鞠躬通文武

百僚臣某以下起居七拜謝宣召赴宴致詞訖舞蹈五拜畢贊各上殿祇候舍人引大臣使相臣僚使副及方茵朵殿應坐臣僚並於西階上殿就位立其餘不應坐臣僚並於西洞門出勾從人入起居謝賜宴兩廊立如初見之儀二人監瓊教坊再拜贊各上殿祇候御牀入大臣進酒舍人閣使贊拜行酒皆如初見之儀次行方茵朵殿臣僚酒傳宣飲盡如常儀殿上酒一行畢兩廊從人行酒如初殿上行餅茶畢教坊致語揖臣僚使副并廊下從人皆起立候口號絕揖臣僚等皆鞠躬贊拜殿上應坐并侍立臣僚皆拜稱萬歲贊各就坐次贊廊下從人拜亦如之歇宴揖臣僚起立御牀出皇帝起入閣引臣僚東西階下殿還幕次內賜花承受官引從人出賜花亦如之簪花畢引從人復兩廊位立次引臣僚使副兩洞門入復殿上位立皇帝出閣復坐御牀入揖應坐臣僚使副及侍立臣僚鞠躬贊拜稱萬歲贊各就坐贊兩廊從人亦如之行單茶行酒行膳行果殿上酒九行使相樂曲聲絕揖兩廊從人起贊拜稱萬歲贊各好去承引出曲破殿上臣僚使副皆起立贊拜稱萬

歲贊各祇候引臣僚使副東西階下殿契丹班謝宴出漢人并使副班謝宴舞蹈五拜畢贊各好去引出畢報閣門無事皇帝起

賀生辰正旦宋使朝辭太后儀臣僚使副班齊如曲宴儀皇太后升殿坐殿前契丹文武起居上殿畢宰臣奏宋使副從人朝辭膀子畢就位立舍人引使副北洞門入面南鞠躬舍人鞠躬通南朝國信使某官某以下祇候辭再拜不出班奏聖躬萬福再拜出班戀闕致詞訖又再拜贊各上殿祇候舍人引南階上殿就位立引從人贊姓名再拜奏聖躬萬福再拜稱萬歲贊各好去引出殿上揖應坐臣僚并使副就位鞠躬贊拜稱萬歲贊各就坐行湯行茶畢揖臣僚并南使起立與應坐臣僚鞠躬贊拜稱萬歲贊各祇候立引使副六人於欄內拜跪受書匣畢直起立揖少前鞠躬受傳答語訖退於北階下殿丹墀內面殿鞠躬舍人贊各好去引出臣僚出

賀生辰正旦宋使朝辭皇帝儀臣僚入朝如常儀宋使至幕次於外賜從人衣物皇帝升殿宣徽契丹文武班起居上殿如曲宴儀中書令奏宋使副并從

人朝辭膀子畢臣僚並於南面侍立教坊起居畢舍人引使副六人北洞門入丹墀北方面南鞠躬舍人鞠躬通南朝國信使某官某以下祇候辭再拜起居戀闕如辭皇太后儀贊各祇候平身立揖使副鞠躬宣徽贊有勅使副再拜鞠躬平身立宣徽使贊各賜卿對衣金帶疋段弓箭鞍馬等想宜知悉使副平身立揖大使三人少前俛伏跪搢笏閣門使授別錄賜物過畢俛起復位立揖副使三人受賜亦如之贊謝恩舞蹈五拜贊上殿祇候舍人引使副南階上殿就位立引從人贊謝恩再拜起居再拜贊賜宴再拜皆稱萬歲贊各祇候承受引兩廊立御牀入皇帝飲酒舍人閣使贊臣僚使副拜稱萬歲皆如曲宴應坐臣僚拜稱萬歲就坐行酒樂曲方茵兩廊皆如之行殺行茶行膳亦如之行饅頭畢從人起如登位使之儀曲破臣僚使副皆起立拜稱萬歲如辭太后之儀使副下殿舞蹈五拜贊各上殿祇候引北階上殿欄內立揖生辰正旦大使二人少前齊跪受書畢起立揖磬折受起居畢退引北階下殿丹墀內並鞠躬舍人贊各好去引南洞門出次引殿上臣僚南北

洞門出畢報閣門無事

高麗使入見儀臣僚常服起居應上殿臣僚殿上序立閣門奏膀子引高麗使副面殿立引上露台拜跪附奏起居訖拜起立閣門傳宣王詢安否使副皆跪大使奏臣等來時詢安引下殿面殿立進奉物入列置殿前控鶴官起居畢引進使鞠躬通高麗國王詢進奉宣徽使殿上贊進奉赴庫馬出擔牀出畢引使副退面西鞠躬舍人鞠躬通高麗國謝恩進奉使某官某以下祇候見舞蹈五拜不出班奏聖躬萬福再拜出班謝面天顏五拜出班謝遠接湯藥五拜贊各祇候使副私獻入列置殿前控鶴官起居引進使鞠躬通高麗國謝恩進奉某官某以下進奉宣徽使殿上贊如初引使副西階上殿序立皇帝不入御牀臣僚伴酒契丹舍人通漢人閣使贊再拜稱萬歲各就坐酒三行殺膳二味若宣令飲盡就位拜稱萬歲贊各就坐殺膳不贊起再拜稱萬歲引下殿舞蹈五拜贊各祇候引出於幕次內別差使臣伴宴起宣賜衣物訖遙謝五拜畢歸館

曲宴高麗使儀臣僚入朝班齊皇帝升殿宣徽教坊控鶴文武班起居皆如常儀謝宣宴如宋使儀贊各上殿祇候契丹臣僚謝宣宴勾高麗使入面南鞠躬舍人鞠躬通高麗國謝恩進奉使某官某以下起居謝宣宴共十二拜贊各上殿祇候臣僚使副就位立大臣進酒契丹舍人通漢人閣使贊上殿臣僚皆拜贊各祇候進酒大臣復位立贊應坐臣僚拜贊各就坐行酒若宣令飲盡贊再拜贊各就坐教坊致語臣僚皆起立口號絕贊再拜贊各就坐凡拜皆稱萬歲曲破臣僚起下殿契丹臣僚謝宴中書令以下謝宴畢引使副謝七拜贊各好去控鶴官門外祇候報閣門無事供奉官捲班出來日問聖體

高麗使朝辭儀臣僚起居上殿如常儀閣門奏高麗使朝辭膀子起居戀闕如宋使之儀贊各上殿祇候引西階上殿立契丹舍人贊拜稱萬歲贊各就坐中書令以下伴酒三行殺膳二味皆如初見之儀既謝贊有勅宴五拜贊各好去引出於幕次內別差使臣伴宴畢賜衣物跪受遙謝五拜歸館

西夏國進奉使朝見儀臣僚常朝畢引使者左入至丹墀面殿立引使者上露臺立揖少前拜跪附奏起居訖俛與復位閣使宣問某安否鞠躬聽旨跪奏某安俛伏興退復位引左下至丹墀面殿立禮物右入左出畢閣使鞠躬通某國進奉使姓名候見共一十七拜贊祇候平立有私獻過畢揖使者鞠躬贊進奉收訖贊祇候引左上殿就位立臣僚使者齊聲啜酒三行引使左下至丹墀謝宴五拜畢贊有勅宴五拜祇候引右出禮畢於外賜宴客省伴宴仍賜衣物

西夏使朝辭儀常朝畢引使者左入通某國某使祇候辭再拜不出班起居再拜出班戀闕致詞復再拜賜衣物謝恩如常儀若賜宴五拜畢贊好去引右出



遼史卷五十二

元中書右丞相總裁脫脫等修

志第二十一

禮志五

嘉儀上

皇帝受冊儀前期一日尙舍奉御設幄於正殿北牖下南面設御坐奉禮郎設  
官僚客使幕次於東西朝堂太樂令設宮懸於殿庭舉麾位在殿第二重西  
階上東向乘黃令陳車輅尙輦奉御陳輿輦尙舍奉御設解劍席于東西階  
設文官六品已上位橫街南東方西向武官五品已上位橫街南西方東向  
皆北上重行每等異位將士各勒所部六軍仗屯諸門金吾仗黃麾仗陳于  
殿庭至日押冊官引冊自西便門入置冊案西階上通事舍人引侍從班入  
就位侍中東階下解劍履上殿欄外俛伏跪奏中巖下殿劍履復位立閣使  
西階上殿欄外跪請木契面殿鞠躬奏奉敕喚仗殿中監少監殿中丞等押

金吾四色仗入位臣僚後協律郎入就舉麾位符寶郎詣閣奉迎通事舍人引文官四品至六品武官三品至五品就門外位皇帝御輦至宣德門宣徽使押內諸司班起居引皇帝至閣服袞冕侍中東階下解劍履上殿版奏外辦太常博士引太常卿太常卿引帝內諸司出協律郎舉麾太樂令令撞黃鍾之鍾左五鍾皆應工人鼓祝樂作皇帝卽御坐宣徽使贊扇合樂止贊簾捲扇開符寶郎奉寶進左右金吾報平安通事舍人引文官三品武官二品已上入門樂作就相向位畢樂止通事舍人引侍從班南班文官三品武官二品已上合班北向東班西上西班東上起居七拜分班各復位通事舍人引押冊官押冊自西階下至丹墀當殿置香案冊案置冊訖樂作就位樂止捧冊官近後東西相對立舍人引侍從班并南班合班北向如初贊再拜在位者皆再拜舞蹈五拜分班各復位如初捧冊官就西階下解劍席解劍履捧冊西階上殿樂作置冊御坐前東西立北向捧冊官西牖下立北上樂止讀冊官出班當殿立贊再拜三呼萬歲就西階下解劍席解劍履西階上殿

欄內立當御坐前侍中取冊捧冊官捧冊匣至讀冊官前跪相對捧冊讀冊  
官俛伏跪讀訖俛伏興捧冊官跪左膝以冊授侍中侍中受冊以冊授執事  
者降自西階劍履訖復當殿位贊再拜三呼萬歲復分班位舍人引侍從班  
南班合班北向如初贊拜在位者皆拜舞蹈鞠躬如初通事舍人引班首西  
階下解劍履上殿樂作就欄內位樂止俛伏跪通全銜臣某等致詞稱賀訖  
俛伏興降西階下帶劍納舄樂作復位樂止贊拜在位者皆再拜舞蹈五拜  
鞠躬侍中臨軒西向稱有制皆再拜侍中宣答訖贊皆再拜舞蹈五拜分班  
各復位三品已上出樂作出門畢樂止侍中當御坐俛伏跪通全銜奏禮畢  
俛伏興退東階下殿帶劍納履復位宣徽使贊扇合下簾太常博士太常卿  
引皇帝起樂作至閣樂止舍人引文官四品武官三品以下出門外分班立  
次引侍從班出次兵部吏部出次金吾出次起居郎舍人出次殿中監少監  
押金吾細仗出仍位臣僚後次東西上閣門使於丹墀內鞠躬奏衙內無事  
捲班出閣門使丹墀內鞠躬揖奉敕放仗出門外文武班中間立喚承受官

承受官聲喏至閣使後鞠躬揖閣使鞠躬稱奉敕放仗承受聲喏鞠躬揖平  
身立引聲奉敕放仗聲絕趨退文武合班再拜舍人一員攝詞令官殿前鞠  
躬揖稱奉敕放黃麾仗出放金吾仗亦如之翼日文武臣僚入問聖躬

太平元年行此儀大略遵唐晉舊儀又有上契丹冊儀以阻午可汗柴冊  
禮合唐禮雜就之又有上漢冊儀與此儀大同小異加以上寶儀

冊皇太后儀前期陳設於元和殿如皇帝受冊之儀至日皇帝御弘政殿冊入  
侍從班入門外金吾列仗文武分班侍中解劍奏中嚴宣徽使請木契喚仗  
皆如之樂工入閣使門外文武班中間立喚承受官聲喏趨至閣使後立閣  
使鞠躬揖稱奉敕喚仗承受官鞠躬聲喏揖引聲奉敕喚仗文武合班再拜  
殿中監押仗入文武官入亦如之宣徽使押內諸司供奉官天橋班候皇太  
后御紫宸殿乘平頭輦童子女童隊樂引至金鸞門閣使奏內諸司起居訖  
贊引駕自下先行至元和殿皇太后入西北隅閣內更衣侍中解劍上殿奏  
外辦宣徽受版入奏侍中降復位協律郎舉麾樂作太樂令太常卿導引皇

太后升坐宣徽使贊扇合簾捲扇開樂止符寶郎奉寶置皇太后坐右左右  
金吾大將軍對揖鞠躬奏軍國內外平安東上閣門副使引丞相東門入西  
上閣門副使引親王西門入通事舍人引文武班入如儀樂作至位樂止文  
武班趨進相向再拜退復位東西上閣門使宣徽使自弘政殿引皇帝御肩  
輿至西便門下引入門樂作至殿前位樂止宣徽使贊皇帝拜問皇太后聖  
躬萬福拜皇帝御西閣坐合班起居如儀北府宰相押冊中書樞密令史八  
人舁冊東西上閣門使引冊宣徽使引皇帝送冊樂作至殿前置冊位樂止  
宣徽使贊皇帝再拜稱萬歲羣臣陪位揖翰林學士四人大將軍四人舁冊  
皇帝捧冊行三舉武授冊舁之西階上殿樂作置太后坐前樂止皇帝冊西  
面東立舍人引丞相當殿再拜三呼萬歲解劍西階上殿樂作至讀冊位樂  
止俛伏跪讀冊訖俛伏三呼萬歲復班位宣徽使引皇帝下殿樂作至殿前  
位樂止皇帝拜舞蹈拜訖引皇帝西階上殿至皇太后坐前位俛跪致詞訖  
俛伏與引西階下至殿前位拜舞蹈拜鞠躬侍中臨軒宣太后答稱有制皇

帝再拜宣訖引皇帝上殿樂作至西閣樂止丞相親王侍從文武合班贊拜舞蹈三呼萬歲如儀丞相上賀侍中宣答如儀丞相以下出舉樂出門樂止侍中奏禮畢宣徽索扇扇合下簾皇太后起舉樂入閣樂止文武官出門外分班侍從兵部吏部起居金吾仗出如儀閣使奏放仗皆如皇帝受冊之儀冊皇后儀至日北南臣僚內外命婦詣端拱殿幕次皇后至閣侍中奏中嚴引命婦班入就東西相向位立皇帝臨軒命使發冊使副押冊至端拱殿門外幕次侍中奏外辦所司承旨索扇扇上舉麾樂作皇后出閣升坐扇開簾捲偃麾樂止引命婦合班面殿起居八拜皇后降坐樂作至殿下褥位樂止引冊入置皇后褥位前侍中傳宣皇后四拜命婦陪位皆拜引讀冊官至皇后褥位前俛伏跪讀訖皇后四拜陪位者皆拜引皇后升殿使臣引冊置皇后坐前冊案退西向侍立命婦當殿稱賀四拜引班首東階上殿致詞訖東階下殿復位四拜侍中奏宣答稱有教旨四拜宣答訖四拜班首上殿進酒皇后賜押冊使副等酒訖侍中奏禮畢承旨索扇樂作皇后起入閣樂止分引

命婦等東西門出

冊皇太子儀前期一日設幄坐于宣慶殿設文武官幕次于朝堂并殿庭板位  
太樂令陳宮縣皆如皇帝受冊儀守宮設皇太子次于朝堂北西向乘黃令  
陳金輅朝堂門外西向皇太子儀仗笳蕭鼓吹等陳宣慶門外典儀設皇太  
子版位于殿橫街南近東北向設文武官五品以上位於樂縣東西餘官如  
常儀至日門下侍郎奉冊中書侍郎奉寶綬各置于案令史二人絳服對舉  
案立寶案在橫街北西向冊案在北門下侍郎中書侍郎並立案後侍中版  
奏中嚴皇太子遠遊冠絳紗袍秉珪出太子舍人引入就版位北面殿立東  
冊宮官三師以下皆從立皇太子東南西向太子入門樂作至位樂止典儀贊  
皇太子再拜在位者皆再拜中書令立太子東北西向門下侍郎引冊案中  
書侍郎取冊進授中書令退復位傳宣官稱有制皇太子再拜傳宣訖再拜  
中書令跪讀冊訖伏興皇太子再拜受冊退授左庶子中書侍郎取寶進  
授中書令皇太子進受寶退授左庶子中書令以下退復位昇案者以案退

典儀贊再拜皇太子拜在位者皆再拜太子舍人引皇太子退樂作出門樂止侍中奏禮畢皇太子升金輅左庶子以下夾侍儀仗鼓吹等並列宣慶門外三師三少諸宮臣於金輅前後導從鳴鑾而行還東宮宮庭先設仗衛如式至宮門鑾止皇太子降金輅舍人引入就位坐文武宮臣序班稱賀禮畢冊王妃公主儀至日押冊使副并讀冊等官押冊東便門入持節前導至殿冊案置橫街北少東引使副等面殿立而鞠躬侍中臨軒稱有制皆再拜鞠躬宣制訖舞蹈五拜引冊於宣慶門出使副等押領儀仗冊案赴各私第廳前向闕陳列設傳宣受冊拜褥冊案置褥左去幕蓋使副案右序立受冊者就位立傳宣稱有制再拜宣制畢昇冊人舉冊匣於褥前跪捧引讀冊者與受冊者皆俛伏跪讀訖皆俛伏與受冊者謝恩國王五拜王妃公主四拜若冊禮同日先上皇太后冊寶次臨軒同制遣使冊皇后諸王妃主次冊皇太子皇帝納后之儀擇吉日至日后族畢集詰旦后出私舍坐于堂皇帝遣使及媒者以牲酒饗餼至門執事者以告使及媒者入謁再拜平身立少頃拜進酒



于皇后次及后之父母宗族兄弟酒徧再拜納幣致詞再拜訖后族皆坐惕  
隱夫人四拜請就車后辭父母伯叔父母兄各四拜宗族長者皆再拜皇后  
升車父母飲后酒致戒詞徧及使者媒者送者發軔伯叔父母兄飲后酒如  
初教坊遮道贊祝后命賜以物后族進拜進酒遂行將至宮門宰相傳敕賜  
皇后酒徧及送者既至惕隱率皇族奉迎再拜皇后車至便殿東南七十步  
止惕隱夫人請降車負銀罍捧膝履黃道行後一人張羔裘若襲之前一婦  
人捧鏡却行置鞍于道后過其上乃詣神主室三拜南北向各一拜酌酒向  
謁者一拜起居訖再拜次詣舅姑御容拜奠酒選皇族諸婦宜子孫者再拜  
之授以罍膝又詣諸帝御容拜奠酒神賜襲衣珠玉珮飾拜受服之后姊若  
妹陪拜者各賜物皇族迎者后族送者徧賜酒皆相偶飲訖后坐別殿送后  
者退食于次媒者傳旨命送后者列于殿北堦皇帝卽御坐選皇族尊者一  
人當輿坐主婚禮命執事者往來致辭于后族引后族之長率送后者升當  
御坐皆再拜又一人少進附奏送后之詞退復位再拜后族之長及送后者

向當奧者三拜南北向各一拜向謁者一拜后族之長跪問聖躬萬福再拜復奏送后之詞又再拜當奧者與媒者行酒三周命送后者再拜皆坐終宴翼日皇帝晨興詣先帝御容拜奠酒訖復御殿宴后族及羣臣皇族后族偶飲如初百戲角觝戲馬較勝以爲樂又翼日皇帝御殿賜后族及贐送后者各有差受賜者再拜進酒再拜皇帝御別殿有司進皇后服飾之籍酒五行送后者辭訖皇族獻后族禮物后族以禮物謝當奧者禮畢

公主下嫁儀選公主諸父一人爲婚主凡當奧者媒者致詞之儀自納幣至禮成大略如納后儀擇吉日詰旦媒者趣尙主之家詣宮媿皇帝皇后御便殿率其族入見進酒訖命皇族與尙主之族相偶飲翼日尙主之家以公主及壻率其族入見致宴于皇帝皇后獻贐送者禮物訖朝辭賜公主青幘車二螭頭蓋部皆飾以銀駕駝送終車一車樓純錦銀螭懸鐸後垂大氍駕牛載羊一謂之祭羊擬送終之具至覆尸儀物咸在賜其壻朝服四時襲衣鞍馬凡所須無不備選皇族一人送至其家

親王女封公主者婚儀倣此以親疏爲差降

遼史卷五十二



遼史卷五十三

元中書右丞相總裁脫脫等修

志第二十二

禮志六

嘉儀下

皇太后生辰朝賀儀至日臣僚入朝國使至幕班齊如常儀皇太后升殿坐皇帝東面側坐契丹舍人殿上通名契丹漢人臣僚宋使副綴翰林學士班東西兩洞門入合班稱賀班首上殿祝壽分班引出皆如正旦之儀教坊起居七拜契丹漢人臣僚入進酒皆如正旦之儀唯宣答稱聖旨皇帝降御座進奉皇太后生辰禮物過畢皇帝殿上再拜殿下臣僚皆再拜皇帝升御座引臣僚分班出引中書令北大王西階上殿奏契丹臣僚進奉次漢人臣僚并諸道進奉控鶴官置擔牀起居四拜畢引進使鞠躬通文武百僚某官某以下高麗夏國諸道進奉宣徽使殿上贊進奉各付所司控鶴官聲喏擔牀過

畢契丹漢人臣僚以次謝五拜贊各祇候引出教坊諸道進奉使謝如之契丹臣僚謝宣宴引上殿就位立漢人臣僚并宋使副東洞門入面西謝宣宴如正旦儀贊各上殿祇候臣僚使副上殿就位立亦如之監踐教坊上殿從人入東廊立皆如之御牀入皇帝初進酒臣僚就位陪拜皇太后飲酒殿上應坐侍立臣僚皆拜稱萬歲贊各祇候立皇太后卒飲手賜皇帝酒皇帝跪卒飲退就褥位再拜臣僚皆陪拜若皇帝親賜使相臣僚宋使副酒皆立飲皇帝升坐贊應坐臣僚并使副皆拜稱萬歲贊各就坐行方褥殿臣僚酒如正旦儀一進酒兩廊從人拜稱萬歲各就坐親王進酒如正旦儀若皇太后手賜親王酒跪飲訖退露臺上五拜贊祇候殿上三進酒行餅茶訖教坊跪致語揖臣僚使副廊下從人皆立口號絕贊拜亦如之行茶行殺膳皆如之大饌入行粥盃殿上七進酒使相臣僚樂曲終揖廊下從人起拜稱萬歲各好去承受官引兩門出曲破揖臣僚使副起鞠躬贊拜皆拜稱萬歲贊各祇候引臣僚使副下殿契丹臣僚謝宴畢出漢人臣僚使副舞蹈五拜畢贊

各好去出洞門畢報閣門無事皇太后皇帝起

應聖節宋遣使來賀生辰正旦始制此儀故詳見賓儀

凡五拜拜興再拜興跪搢笏三舞蹈三叩頭出笏就拜興拜興再拜興其就拜亦曰俛伏興

賓儀臣僚皆日坐於此儀曰高衲與方衲別

皇帝生辰朝賀儀臣僚國使班齊皇帝升殿坐臣僚使副入合班稱賀合班出皆如皇太后生辰儀中書令北大王奏諸道進奉表目教坊起居七拜臣僚東西門入合班再拜贊進酒班首上殿進酒宣徽使宣答羣臣謝宣諭分班奏樂皇帝卒飲合班班首下殿分班出皆如正旦之儀進奉皆如皇太后生辰儀皇帝詣皇太后殿近上皇族外戚大臣並從奉迎太后卽皇帝殿坐皇太后御小輦皇帝輦側步從臣僚分行序引宣徽使諸司閣門攢隊前引教坊動樂控鶴起居四拜引駕臣僚並於山樓南方立候皇太后入閣揖使副并臣僚入幕次皇太后升殿坐皇帝東方側坐引契丹漢人臣僚使副兩洞

門入合班起居舞蹈五拜贊各祗候面殿立皇帝降御座殿上立進皇太后  
生辰物過畢皇帝殿上再拜殿上下臣僚皆拜皇帝升御座引臣僚分班出  
契丹臣僚入謝宣宴漢人臣僚使副入通名謝宣宴上殿就位不應坐臣僚  
出從人入皆如儀御牀入皇帝初進皇太后酒皇太后賜皇帝酒皆如皇太  
后生辰儀贊各就坐行酒宣飲盡就位謝如儀殿上一進酒畢從人入就位  
如儀親王進酒行餅茶教坊致語如儀行茶行殺膳如儀七進酒使相樂曲  
終從人起曲破臣僚使副起餘皆如正旦之儀

皇后生辰儀臣僚昧爽朝皇帝皇后大帳前拜日契丹漢人臣僚陪拜皇帝升  
殿坐皇后再拜臣僚殿下合班陪拜皇帝賜皇后生辰禮物皇后殿上謝再  
拜臣僚皆拜契丹舍人通名契丹漢人臣僚以次入賀踐入舍人贊舞蹈五  
拜起居不表聖躬萬福贊再拜班首上殿拜跪自通全銜祝壽訖引下殿復  
位鞠躬贊舞蹈五拜贊各祗候引宰臣一員上殿奏百僚諸道進表目教坊  
起居七拜不賀控鶴官起居四拜諸道押衙附奏起居賜宴共八拜契丹漢



人合班進壽酒舞蹈五拜引大臣一員上殿欄外褥位拑笏執臺瓊進酒皇  
帝皇后受瓊退復褥位授臺出笏欄內拜跪自通全銜祝壽臣等謹進千萬  
歲壽酒訖引下殿復位舞蹈五拜鞠躬宣徽使奏宣答如儀引上殿拑笏執  
臺皇帝皇后飲殿下臣僚分班教坊奏樂皆拜稱萬歲卒飲皇帝皇后授瓊  
引下殿舞蹈五拜贊各祇候引出臣僚進奉如儀宣宴如儀教坊監瓊臣僚  
上殿祇候如儀皇后進皇帝酒殿上贊拜侍臣僚皆拜皇帝受瓊皆拜皇后  
坐契丹舍人漢人閣使殿上贊拜皆拜稱萬歲贊各就坐大臣進皇帝皇后  
酒行酒如儀酒三行行殺行膳又進皇帝皇后酒酒再行大饌入行粥教坊  
致語臣僚皆起立口號絕贊拜稱萬歲引下殿謝宴引出皆如常儀

進士接見儀其日舉人從時相至御帳側通名膀子與時相膀子同奏訖時相  
朝見如常儀畢揖進士第一名以下丹墀內面殿鞠躬通名四拜贊各祇候  
皆退若有進文字者不退奉卷平立閣門奏受跪左膝授訖直起退禮畢

進士賜等甲敕儀臣僚起居畢讀卷官奏訖於左方依等甲唱姓名序立閣使

交收敕牒閣使奏引至丹墀依等甲序立閣使稱有敕再拜鞠躬舍人宣敕各依等甲賜卿敕牒一道想宜知悉揖拜各跪左膝受敕訖鞠躬皆再拜各祇候分引左右相向侍立候奏事畢引兩階上殿就位齊聲喏賜坐酒三行起聲喏如初退揖出禮畢牌印郎君行酒閣使勸飲

進士賜章服儀皇帝御殿臣僚公服引進士入東方面西再拜揖就丹墀位面殿鞠躬閣使稱有敕再拜鞠躬舍人宣敕各依等甲賜卿敕牒一道兼賜章服想宜知悉揖再拜跪受敕訖再拜退引至章服所更衣訖揖復丹墀位鞠躬贊謝恩舞蹈五拜各祇候殿東亭內序立聲喏坐賜宴簪花宣閣使一員閣門三人或二人勸飲終日禮畢

宰相中謝儀皇帝常服升殿坐諸班起居如常儀應坐臣僚上殿其餘臣僚殿下東西侍立皆如宋使初見之儀引中謝官左入至丹墀面西立舍人當殿鞠躬通新受具官姓名祇候中謝宣徽殿上索通班舍人就贊禮位贊某官至宣徽贊通班舍人二人對立揖中謝官鞠躬贊就拜位舍人二人引面殿

鞠躬贊拜中謝官舞蹈五拜不出班奏聖躬萬福贊再拜揖出班跪敘官致詞訖俛伏興復位贊拜舞蹈五拜又出班中謝致詞如初儀共十有七拜贊祇候引右階上殿就位揖應坐臣僚聲喏坐供奉官行酒傳宣飲盡臣僚搯笏執棧起位後立飲置棧出笏贊拜臣僚皆再拜贊各坐搯笏執棧授供奉官棧酒三行揖應坐臣僚聲喏立引中謝官右階下殿至丹墀面殿鞠躬贊拜舞蹈五拜引右出臣僚皆出丞相樞密使同餘官不升殿賜酒不帶節度使不通班止通名七拜衆謝班首一人出班中謝

拜表儀其日先於東上閣門陳設氈位分引南北臣僚諸國使副於氈位合班通事舍人二人舁表案置班首前揖鞠躬再拜平身中書舍人立案側班首跪搯笏與捧表跪左膝以表授中書舍人出笏就拜興再拜中書舍人復置表案上通事舍人舁表案於東上閣門入捲班分引出禮畢

元日皇帝不御坐行此儀餘應上表有故皆倣此

賀生皇子儀其日奉先帝御容設正殿皇帝御八角殿升坐聲警畢北南宣徽

使殿階上左右立北南臣僚金冠盛服合班入班首二人捧表立讀表官先於左階上側立二宣徽使東西階下殿受表捧表者跪左膝授訖就拜興再拜各祇候二宣徽使俱左階上授讀表官讀訖揖臣僚鞠躬引北面班首左階上殿欄內稱賀訖引左階下殿復位舞蹈五拜禮畢

賀祥瑞儀聲警北南臣僚金冠盛服合班立班首二人各奉表賀北南宣徽使左階下殿受表上殿授讀表大臣讀訖揖殿下臣僚鞠躬五拜畢鞠躬引班首二人左階上殿欄內拜跪稱賀致詞訖引左階下殿復位五拜畢鞠躬宣答聽制訖再拜鞠躬謝宣諭五拜畢各祇候分班侍立禮畢兩府奏事如常

乾統六年木葉山瑞雲見始行此儀天慶元年天雨穀謝宣諭後趙王進酒教坊動樂臣僚酒一行禮畢奏事

賀平難儀皇帝皇后升殿坐北南臣僚并命婦合班五拜揖班首二人出班俛跪拵笏執表舁案近前閣使受表置案上皆再拜通事舍人二人舁案左階上殿置露臺上讀表官受入讀表對御讀訖臣僚殿下五拜鞠躬引班首二

人左右階上殿欄內並立先引北面班首少前跪致詞訖退復褥位次引南面班首亦如之畢分引左右階下殿復位五拜鞠躬宣徽稱有敕再拜宣答內難已平與公等內外同慶謝宣諭五拜捲班臣僚從皇帝命婦從皇后詣皇太后殿見先帝御容陪位皆再拜皇太后正坐稱賀共十拜並引上殿賜宴如儀

平難之儀道宗清寧九年太叔重元謀逆仁懿太后親率衛士與逆黨戰事平因制此儀

正旦朝賀儀臣僚并諸國使味爽入朝奏班齊皇帝升殿坐契丹舍人殿上通訖引契丹臣僚東洞門入引漢人臣僚并諸國使西洞門入合班舞蹈五拜鞠躬平身引親王東階上殿欄內褥位俛伏跪自通全銜臣某等祝壽訖伏與退引東階下殿復位舞蹈五拜畢鞠躬宣徽使殿上鞠躬奏臣宣答稱有敕班首以下聽制訖再拜鞠躬宣徽傳宣云履新之慶與公等同之舍人贊謝宣諭拜舞蹈五拜贊各祗候分班引出引班首西階上殿奏表目訖教坊

起居賀十二拜畢贊各祇候引契丹漢人臣僚并諸國使東西洞門入合班再拜贊進酒引親王東階上殿就欄內褥位搢笏執臺琖進酒訖退復褥位置臺出笏少前俛跪自通全銜臣某等謹進千萬歲壽酒俛伏興退復褥位與殿下臣僚皆再拜鞠躬俟宣徽使殿上鞠躬奏臣宣答稱有制親王以下再拜如初儀傳宣云飲公等壽酒與公等內外同慶舍人贊謝宣諭如初贊各祇候親王搢笏執臺殿下臣僚分班皇帝飲酒教坊奏樂殿上下臣僚皆拜稱萬歲贊各祇候樂止教坊再拜皇帝卒飲親王進受琖復褥位置臺琖出笏揖臣僚合班引親王東階下殿復位鞠躬再拜贊各祇候分班引出皇帝起詣皇太后殿臣僚并諸國使皆從皇太后升殿皇帝東方側坐引契丹漢人臣僚并諸國使兩洞門入班稱賀進酒皆如皇帝之儀畢引出教坊入起居進酒亦如之皇太后宣答稱聖旨契丹班謝宣宴上殿就位立漢人臣僚并諸國使東洞門入丹墀東方面西鞠躬舍人鞠躬通文武百僚宰臣某已下謝宣宴再拜出班致詞訖退復位舞蹈五拜贊各上殿祇候引宰臣以

下并諸國使副方袞朶殿臣僚西階上殿就位立不應坐臣僚並於西洞門出二人監瓊教坊再拜贊各上階下殿謝宴如皇太后生辰儀

冬至朝賀儀臣僚班齊如正旦儀皇帝皇后拜日臣僚陪位再拜皇帝皇后升殿坐契丹舍人通臣僚入合班親王祝壽宣答皆如正旦之儀謝訖舞蹈五拜鞠躬出班奏聖躬萬福復位再拜鞠躬班首出班俛伏跪祝壽訖伏興舞蹈五拜鞠躬贊各祇候分班不出合班御牀入再拜鞠躬贊進酒臣僚平身引親王左階上殿就欄內褥位搯笏執臺瓊進酒皇帝皇后受瓊訖退就褥位置臺出笏俛伏跪少前自通全銜臣某等謹進千萬歲壽酒俛伏興退復褥位再拜鞠躬殿下臣僚皆再拜鞠躬宣答如正旦儀親王搯笏執臺分班皇帝皇后飲酒奏樂殿上下臣僚皆拜稱萬歲壽樂止教坊再拜臣僚合班親王進受瓊至褥位置臺瓊出笏引左階下殿御牀出親王復丹墀位再拜鞠躬贊祇候分班引出班首右階上殿奏表目進奉諸道進奉教坊進奉過訖贊進奉收班首舞蹈五拜鞠躬贊各祇候班首出臣僚復入合班謝舞蹈

五拜鞠躬贊各祇候分班引出聲警皇帝皇后起赴北殿皇太后於御容殿與皇帝皇后率臣僚再拜皇太后上香皆再拜贊各祇候可矮襖以上上殿皇太后三進御容酒陪位皆拜皇太后升殿坐皇帝就露臺上褥位親王押北南臣僚班丹墀內立皇帝再拜臣僚皆拜鞠躬皇帝欄內跪祝皇太后壽訖復位再拜凡拜皆稱萬歲贊各祇候臣僚不出皇帝皇后側座親王進酒臣僚陪拜皇太后宣答皆如正旦之儀臣僚分班不出班首右階上殿奏表目合班謝宣宴上殿就位如儀御牀入皇帝進皇太后酒如初各就座行酒宣飲盡如皇太后生辰之儀皇后進酒如皇帝之儀三進酒行茶教坊致語行殺膳大饌七進酒曲破臣僚起御牀出謝宴皆如皇太后生辰儀

立春儀皇帝出就內殿拜先帝御容北南臣僚丹墀內合班再拜可矮襖以上入殿賜坐帝進御容酒陪位并侍立皆再拜一進酒臣僚下殿左右相向立皇帝戴幡勝等第賜幡勝臣僚簪畢皇帝於土牛前上香三奠酒不拜教坊動樂侍儀使跪進綵杖皇帝鞭土牛可矮襖以上北南臣僚丹墀內合班跪



左膝受綵杖直起再拜贊各祗候司辰報春至鞭土牛三匝矮襖鞭止引節  
度使以上上殿撒穀豆擊土牛撒穀豆許衆奪之臣僚依位坐酒兩行春盤  
入酒三行畢行茶皆起禮畢

重午儀至日臣僚味爽赴御帳皇帝繫長壽綵縷升車坐引北南臣僚合班如  
丹墀之儀所司各賜壽縷揖臣僚跪受再拜引退從駕至膳所酒三行若賜  
宴臨時聽敕

重九儀北南臣僚旦赴御帳從駕至圍場賜茶皇帝就坐引臣僚御前班立所  
司各賜菊花酒跪受再拜酒三行揖起

藏鬪儀至日北南臣僚常服入朝皇帝御天祥殿臣僚依位賜坐契丹南面漢  
人北面分朋行鬪或五或七籌賜膳入食畢皆起頃之復坐行鬪如初晚賜  
茶三籌或五籌罷教坊承應若帝得鬪臣僚進酒訖以次賜酒

太康十年十二月二十二日始行是儀是日不御朝

歲時雜儀正旦國俗以糯飯和白羊髓爲餅丸之若拳每帳賜四十九枚戊夜

各於帳內窗中擲丸於外數偶動樂飲宴數奇令巫十有二人鳴鈴執箭繞帳歌呼帳內爆鹽爐中燒地拍鼠謂之驚鬼居七日乃出國語謂正旦為廼捏咿哢廼正也捏咿哢旦也

立春婦人進春書刻青繒為幟像龍御之或為蟾蜍書幟曰宜春

人日凡正月之日一雞二狗三豕四羊五馬六牛七日為人其占晴為祥陰為災俗煎餅食於庭中謂之薰天

二月一日為中和節國舅族蕭氏設宴以延國族耶律氏歲以為常國語是日為忞里忞忞里請也忞時也忞讀若狎忞讀若頗

二月八日為悉達太子生辰京府及諸州雕木為像儀仗百戲導從循城為樂悉達太子者西域淨梵王子姓瞿曇氏名釋迦牟尼以其覺性稱之曰佛

三月三日為上巳國俗刻木為兔分朋走馬射之先中者勝負朋下馬列跪進酒勝朋馬上飲之國語謂是日為陶里樺陶里兔也樺射也

五月重五日午時採艾葉和綿著衣七事以奉天子北南臣僚各賜三事君臣

宴樂渤海膳夫進艾糕以五綵絲爲索纏臂謂之合歡結又以綵絲宛轉爲人形簪之謂之長命縷國語謂是日爲討賽咿唳討五賽咿唳月也

夏至之日俗謂之朝節婦人進綵扇以粉脂囊相贈遺

六月十有八日國俗耶律氏設宴以延國舅族蕭氏亦謂之忡里厨

七月十三日夜天子於宮西三十里卓帳宿焉前期備酒饌翼日諸軍部落從者皆動蕃樂飲宴至暮乃歸行宮謂之迎節十五日中元動漢樂大宴十六日昧爽復往西方隨行諸軍部落大譟三謂之送節國語謂之賽咿唳奢奢好也

八月八日國俗屠白犬於寢帳前七步瘞之露其喙後七日中秋移寢帳於其上國語謂之捏褐耐捏褐大也耐首也

九月重九日天子率羣臣部族射虎少者爲負罰重九宴射畢擇高地卓帳賜蕃漢臣僚飲菊花酒兔肝爲醬鹿舌爲醬又研茱萸酒洒門戶以禳穰國語謂是日爲必里遲離九月九日也

歲十月五京進紙造小衣甲槍刀器械萬副十五日天子與羣臣望祭木葉山用國字書狀并焚之國語謂之戴辣戴燒也辣甲也

冬至日國俗屠白羊白馬白鴈各取血和酒天子望拜黑山黑山在境北俗謂國人魂魄其神司之猶中國之岱宗云每歲是日五京進紙造人馬萬餘事祭山而焚之俗甚嚴畏非祭不敢近山

臘辰日天子率北南臣僚並戎服戊夜坐朝作樂飲酒等第賜甲仗羊馬國語謂是日爲炒伍倆厨炒伍倆戰也

再生儀凡十有二歲皇帝本命前一年季冬之月擇吉日前期禁門北除地置再生室母后室先帝神主輿在再生室東南倒植三岐木其日以童子及產醫嫗置室中一婦人執酒一隻持矢箠立於室外有司請神主降輿致奠奠訖皇帝出寢殿詣再生室羣臣奉迎再拜皇帝入室釋服跣以童子從三過岐木之下每過產醫嫗致詞拂拭帝躬童子過岐木七皇帝臥木側叟擊箠曰生男矣太巫幪皇帝首與羣臣稱賀再拜產醫嫗受酒于執酒婦以進太

巫奉襪綵結等物贊祝之預選七叟各立御名繫于綵皆跪進皇帝選嘉  
名受之賜物再拜退羣臣皆進襪襪綵結等物皇帝拜先帝諸御容遂宴羣  
臣

善哉阻午可汗之垂訓後嗣也孺子無不慕其親者嗜欲深而愛淺妻子  
具而孝衰人人皆然而況天子乎再生之儀歲一周星使天子一行是禮  
以起其孝心夫體之也真則其思之也切孺子之慕將有油然而發于中心  
者感發之妙非言語文字之所能及善哉阻午可汗之垂訓後嗣也始之  
以三過岐木母氏劬勞能無念乎終之以拜先帝御容敬承宗廟宜何如  
哉詩曰無念爾祖聿脩厥德

遼史卷五十三



遼史卷五十四

元中書右丞相總裁脫脫等修

志第二十三

樂志

遼有國樂有雅樂有大樂有散樂有鏡歌橫吹樂舊史稱聖宗興宗咸通音律  
聲氣歌辭舞節徵諸太常儀鳳教坊不可得按紀志遼朝雜禮參考史籍定其  
可知者以補一代之闕文嗚呼咸韶夏武之樂聲亡書逸河間作記史遷因以  
爲書寥乎希哉遼之樂觀此足矣

國樂

遼有國樂猶先王之風其諸國樂猶諸侯之風故志其略

正月朔日朝賀用宮懸雅樂元會用大樂曲破後用散樂角觥終之是夜皇帝  
燕飲用國樂

七月十三日皇帝出行宮三十里卓帳十四日設宴應從諸軍隨各部落動樂

十五日中元大宴用漢樂

春飛放杏塢皇帝射獲頭鵝薦廟燕飲樂工數十人執小樂器侑酒

諸國樂

太宗會同三年晉宣徽使楊端王朮等及諸國使朝見皇帝御便殿賜宴端朮起進酒作歌舞上爲舉觴極歡

會同三年端午日百僚洎諸國使稱賀如式燕飲命回鶻燉煌二使作本國舞天祚天慶二年駕幸混同江頭魚酒筵半酣上命諸酋長次第歌舞爲樂女直阿骨打端立直視辭以不能上謂蕭奉先曰阿骨打意氣雄豪顧視不常可托以邊事誅之不然恐貽後患奉先奏阿骨打無大過殺之傷向化之意叢爾小國又何能爲

雅樂

自漢以後相承雅樂有古頌焉有古大雅焉遼闕郊廟禮無頌樂大同元年太宗自汴將還得晉太常樂譜宮懸樂架委所司先赴中京



聖宗太平元年尊號冊禮設宮懸於殿庭舉麾位在殿第三重西階之上協律郎各入就舉麾位太常博士引太常卿太常卿引皇帝將仗動協律郎舉麾太樂令令撞黃鍾之鍾左右鍾皆應工人舉祝樂作皇帝卽御坐扇合樂止王公入門樂作至位樂止

通事舍人引押冊大臣初動樂作置冊殿前香案訖就位樂止

昇冊官奉冊初動樂作升殿置冊御坐前就西墉北上位樂止

大臣上殿樂作至殿欄內位樂止

大臣降殿階樂作復位樂止

王公三品以上出樂作太常博士引太常卿太常卿引皇帝降御坐入閣樂止

興宗重熙九 years 上契丹冊皇帝出奏隆安之樂

聖宗統和元年冊承天皇帝太后設宮懸篋太樂工協律郎入

太后儀衛動舉麾太和樂作太樂令太常卿導引升御坐簾捲樂止

文武三品以上入舒和樂作至位樂止

皇帝入門雍和樂作至殿前位樂止

宰相押冊皇帝隨冊樂作至殿前置冊於案樂止

翰林學士大將軍昇冊樂作置御坐前樂止

丞相上殿樂作至讀冊位樂止

皇帝下殿樂作至位樂止

太后宣答訖樂作皇帝至西閣樂止

親王丞相上殿樂作退班出樂止

下簾樂作皇太后入內樂止

冊皇太子儀太子初入門貞安之樂作

冊禮樂工次第

四隅各置建鼓一虞樂工各一人

宮懸每面九虞每虞樂工一人

樂虞近北置祝啟各一樂工各一人

樂虞內坐部樂工左右各一百二人

樂虞西南武舞六十四人執小旗二人

樂虞東南文舞六十四人執小旗二人

協律郎二人

太樂令一人

唐十二和樂遼初用之

豫和祀天神

順和祭地祇

永和享宗廟

肅和登歌奠玉帛

雍和入俎接神

壽和酌獻飲神

太和節升降

舒和節出入

昭和舉酒

休和以飯

正和皇后受冊以行

承和太子以行

遼十二安樂初梁改唐十二和樂爲九慶樂後唐建唐宗廟仍用十二和樂晉改爲十二同樂遼雜禮天子出入奏隆安太子行奏貞安則是遼嘗改樂名矣餘十安樂名缺

遼雅樂歌辭文闕不具八音器數大抵因唐之舊

八音

金 罇 鍾

石 球 磬

絲 琴瑟

竹 簫簫箏

匏 笙竽

土 壎

革 鼓鼗

木 柷敔

十二律用周黍尺九寸管空徑三分爲本道宗太康中詔行秬黍所定升斗嘗  
定律矣其法大抵用古律焉

### 大樂

自漢以來因秦楚之聲置樂府至隋高祖詔求知音者鄭譯得西域蘇祇婆七  
旦之聲求合七音八十四調之說由是雅俗之樂皆此聲矣用之朝廷別於雅  
樂者謂之大樂晉高祖使馮道劉煦冊應天太后太宗皇帝其聲器工官與法  
駕同歸於遼

聖宗太平元年冊承天皇后童子弟子隊樂引太后輦至金鑾門

天祚皇帝天慶元年上半年上壽儀

皇帝出東閣鳴鞭樂作 簾捲扇開樂止

太尉執臺分班太樂令舉麾樂作 皇帝飲酒訖樂止

應坐臣僚東西外殿太樂令引堂上樂升大臣執臺太樂令奏舉觴登歌樂  
作飲訖樂止

行臣僚酒徧太樂令奏巡周舉麾樂作 飲訖樂止

太常卿進御食太官令奏食徧樂作 文舞入三變引出樂止

次進酒行臣僚酒舉觴巡周樂作 飲訖樂止

次進食食徧樂作 武舞入三變引出樂止

扇合簾下鳴鞭樂作 皇帝入西閣樂止

大樂器本唐太宗七德九功之樂武后毀唐宗廟七德九功樂舞遂亡自後宗廟用隋文武二舞朝廷用高宗景雲樂代之元會第一奏景雲樂舞杜佑通典

已稱諸樂並亡唯景雲樂舞僅存唐末五代版蕩之餘在者希矣遼國大樂晉代所傳雜禮雖見坐部樂工左右各一百二人蓋亦以景雲遺工充坐部其坐立部樂自唐已亡可考者唯景雲四部樂舞而已

玉磬

方響

搗箏

筑

臥箏篥

大箏篥

小箏篥

大琵琶

小琵琶

大五絃

小五絃

吹葉

大笙

小笙

簫

簫

銅鈸

長笛

尺八笛

短笛

以上皆一人

毛員鼓

連鼓



具

以上皆二人餘每器工一人

歌二人

舞二十人分四部

景雲舞八人

慶雲樂舞四人

破陣樂舞四人

承天樂舞四人

大樂調雅樂有七音大樂亦有七聲謂之七旦一曰婆陁力平聲二曰雞識長聲三曰沙識質直聲四曰沙侯加濫聲五曰沙臘皆應聲六曰般贍五聲七曰俟利箎斛先聲自隋以來樂府取其聲四旦二十八調爲大樂

婆陁力旦

正宮

高宮

中呂宮

道調宮

南呂宮

仙呂宮

黃鍾宮

雞識旦

越調

大食調

高大食調

雙調

小食調

歇指調

林鍾商調

沙識旦

大食角

高大食角

雙角

小食角

歇指角

林鍾角

越角

沙侯加盪旦

中呂調

正平調

高平調

仙呂調

黃鍾調

般涉調

高般涉調

右四旦二十八調不用黍律以琵琶絃叶之皆從濁至清迭更其聲下益濁上益清七七四十九調餘二十一調失其傳蓋出九部樂之龜茲部云

大樂聲各調之中度曲協音其聲凡十曰五凡工尺上一四六勾合近十二雅律於律呂各闕其一猶雅音之不及商也

散樂

殷人作靡靡之樂其聲往而不反流爲鄭衛之聲秦漢之間秦楚聲作鄭衛寢亡漢武帝以李延年典樂府稍用西涼之聲今之散樂俳優歌舞雜進往往漢樂府之遺聲音天福三年遣劉煦以伶官來歸遼有散樂蓋由此矣

遼冊皇后儀

呈百戲角觥戲馬以爲樂

皇帝生辰樂次

酒一行 鬻篋起歌

酒二行 歌手伎入

酒三行 琵琶獨彈

餅茶致語

食入雜劇進

酒四行

闕

酒五行 笙獨吹鼓笛進

酒六行 箏獨彈築毬

酒七行 歌曲破角觥

曲宴宋國使樂次

酒一行 麇篥起歌

酒二行 歌

酒三行 歌手伎入

酒四行 琵琶獨彈

餅茶致語

食入雜劇進

酒五行

闕

酒六行 笙獨吹合法曲

酒七行 箏獨彈

酒八行 歌擊架樂

酒九行 歌角觥

散樂以三音該三才之義四聲調四時之氣應十二管之數截竹爲四竅之笛

以叶音聲而被之絃歌三音天音揚地音抑人音中皆有聲無文四時春聲曰平夏聲曰上秋聲曰去冬聲曰入

散樂器箏箏簫笛笙琵琶五絃篳篥箏方響杖鼓第二鼓第三鼓腰鼓大鼓鞀拍板

雜戲自齊景公用倡優侏儒至漢武帝設魚龍曼延之戲後漢有繩舞自劊之伎杜佑以爲多幻術皆出西域哇俚不經故不具述

### 鼓吹樂

鼓吹樂一曰短簫鏡歌樂自漢有之謂之軍樂遼雜禮朝會設熊羆十二案法駕有前後部鼓吹百官鹵簿皆有鼓吹樂

### 前部

鼓吹令二人

摑鼓十二

金鉦十二

大鼓百二十

長鳴百二十

鏡十二

鼓十二

歌二十四

管二十四

簫二十四

箛二十四

後部

大角百二十

鼓吹丞二人

羽葆十二

鼓十二



管二十四

簫二十四

鏡十二

鼓十二

簫二十四

箛二十四

右前後鼓吹行則導駕奏之朝會則列仗設而不奏

橫吹樂

橫吹亦軍樂與鼓吹分部而同焉皆屬鼓吹令

前部

大橫吹百二十

節鼓二

笛二十四

麝簞二十四

箛二十四

桃皮麝簞二十四

摑鼓十二

金鈺十二

小鼓百二十

中鳴百二十

羽葆十二

鼓十二

管二十四

簫二十四

箛二十四

後部

小橫吹百二十四

笛二十四

簫二十四

觱篥二十四

桃皮觱篥二十四

百官鼓吹橫吹樂自四品以上各有增損見儀衛志自周衰先王之樂寢以亡缺周南變爲秦風始皇有天下鄭衛秦燕趙楚之聲迭進而雅聲亡矣漢唐之盛文事多西音是爲大樂散樂武事皆北音是爲鼓吹橫吹樂雅樂在者其器雅其音亦西云

遼史卷五十四

卷之二十一

...

...

...

...

...

...

...

...

...

...

...

遼史卷五十五

元中書右丞相總裁脫脫等修

志第二十四

儀衛志一

遼太祖奮自朔方太宗繼志述事以成其業於是舉渤海立敬瑭破重貴盡致周秦兩漢隋唐文物之遺餘而居有之路車法物以隆等威金符玉璽以布號令是以傳至九主二百餘年豈獨以兵革之利士馬之強哉文謂之儀武謂之衛足以成一代之規模矣考遼所有輿服符璽儀仗作儀衛志

輿服

自皇帝而降輿服之制其來遠矣禹乘四載作小車商人得桑根之瑞爲大輅周人加金玉象飾益備秦取六國儀物而分別其用先王之制置而弗御至漢中葉銳意稽古然禮文之事各存實亡蓋得十一於千百焉唐之車輅因周隋遺法損益可知而祭服皆青朝服皆絳常服用宇文制以紫緋綠碧分品秩五

代頗以常服代朝服遼國自太宗入晉之後皇帝與南班漢官用漢服太后與北班契丹臣僚用國服其漢服卽五代晉之遺制也考之載籍之可徵者著輿服篇冠諸儀衛之首

國輿

契丹故俗便於鞍馬隨水草遷徙則有氈車任載有大車婦人乘馬亦有小車貴富者加之華飾禁制疎闊貴適用而已帝后加隆勢固然也輯其可知著于篇

大輿柴冊再生儀載神主見之

輿臘儀見皇帝皇后升輿降輿

總纛車駕以御馳祭山儀見皇太后升總纛車

車納后儀見皇后就車

青憶車二螭頭蓋部皆飾以銀駕用駝公主下嫁以賜之古者王姬下嫁車

服不繫其夫下王后一等此其遺意歟

送終車車樓純飾以錦螭頭以銀下縣鐸後垂大氈駕以牛上載羊一謂之祭羊以擬送終之用亦賜公主

椅冊皇太后儀皇帝乘椅自便殿輦至西便門

鞍馬祭山儀皇帝乘馬侍皇太后行臘儀皇帝降輿祭東畢乘馬入臘圍瑟瑟儀俱乘馬東行羣臣在南命婦在北

### 漢輿

太宗皇帝會同元年晉使馮道劉煦等備車輅法物上皇帝皇太后尊號冊禮自此天子車服昉見於遼太平中行漢冊禮乘黃令陳車輅尙輦奉御陳輿輦盛唐輦輅盡在遼廷矣

五輅周官典輅有五輅秦亡之後漢創製

玉輅祀天祭地享宗廟朝賀納后用之青質玉飾黃屋左纛十二鑾在衡二鈴在軾龍駟左建旂十二旒皆畫升龍長曳地駕蒼龍金麥鏤錫鞶纓十二就遼國勘箭儀皇帝乘玉輅至內門聖宗開泰十年上升玉輅自內三

門入萬壽殿進七廟御容酒

金輅饗射祀還飲至用之赤質金飾餘如玉輅色從其質駕赤騮

象輅行道用之黃質象飾餘如金輅駕黃騮

革輅巡狩武事用之白質革鞅駕白翰

木輅田獵用之黑質漆飾駕黑駱

車制小於輅小事乘之

耕根車耕籍用之青質蓋三重餘如玉輅

安車一名進賢車臨幸用之金飾重輿曲壁八鑿在衡紫油纁朱裏憶朱絲

絡網駕赤騮朱鞶纓

四望車一名明遠車拜陵臨弔則用之金飾青油纁朱裏通憶駕牛餘同安

車

涼車赤質省方罷獵用之赤質金塗銀裝五綵龍鳳織藤油壁緋條蓮座駕

以橐駝



輦用人挽本宮中所乘唐高宗始制七輦周官巾車有輦以人組挽之太平冊  
禮皇帝御輦

大鳳輦赤質頂有金鳳壁畫雲氣金翅前有軾下有构欄絡帶皆繡雲鳳銀  
梯主輦八十人

大芳輦

仙游輦

小輦永壽節儀皇太后乘小輦

芳亭輦黑質幕屋緋欄皆繡雲鳳朱綠夾窗花板紅網兩簾四竿銀飾梯主

輦百二十人

大玉輦

小玉輦

逍遙輦常用之樓屋赤質金塗銀裝紅條輦官十二人春夏緋衫秋冬素錦

服

平頭輦常用之制如逍遙無屋冊承天皇太后儀皇太后乘平頭輦

步輦聖宗統和三年駐蹕土河乘步輦聽政

羊車古輦車赤質兩壁龜文鳳翅緋幟絡帶門簾皆繡瑞羊畫輪駕以牛隋  
易果下馬童子十八人服繡瑞羊挽之

輿以人肩之天子用鞵絡臂綰

腰輿前後長竿各二金銀螭頭緋繡鳳襪上施錦褥別設小床奉輿十六人  
小輿赤質青頂曲柄緋繡絡帶制如鳳輦而小上有御座奉輿二十四人

皇太子車輅

金輅從祀享正冬大朝納妃用之冊皇太子儀乘黃令陳金輅皇太子升降

金輅

輅車五日常朝享宮臣出入行道用之金飾紫幟朱裏駕一馬

四望車弔臨用之金飾紫油纒通幟駕一馬

遼史卷五十五

遼史卷五十六

元中書右丞相總裁脫脫等修

志第二十五

儀衛志二

國服

上古之人網罟禽獸食肉衣皮以儷鹿韋掩前後謂之鞞然後夏葛冬裘之製與焉周公陳王業七月之詩至於一日于貉三月條桑八月載績公私之用由是出矣契丹轉居薦草之間去遼古之風猶未遠也太祖仲父述瀾以遙輦氏于越之官占居潢河決壤始置城邑爲樹藝桑麻組織之教有遼王業之隆其亦肇迹於此乎太祖帝北方太宗制中國紫銀之鼠羅綺之筐籬載而至纖麗更毳被土綢木於是定衣冠之制北班國制南班漢制各從其便焉詳國服以著厥始云

祭服遼國以祭山爲大禮服飾尤盛

大祀皇帝服金文金冠白綾袍紅帶縣魚三山紅垂飾犀玉刀錯絡縫烏鞞  
小祀皇帝硬帽紅克絲龜文袍皇后戴紅帕服絡縫紅袍縣玉佩雙同心帕  
絡縫烏鞞

臣僚命婦服飾各從本部旗幟之色

朝服太祖丙寅歲卽皇帝位朝服衷甲以備非常其後行瑟瑟禮大射柳卽此  
服聖宗統和元年冊承天皇后給三品以上用漢法服三品以下用大射柳  
之服

皇帝服實里薛袞冠絡縫紅袍垂飾犀玉帶錯絡縫鞞謂之國服袞冕太宗  
更以錦袍金帶

臣僚戴氈冠金花爲飾或加珠玉翠毛額後垂金花織成夾帶中貯髮一總  
或紗冠制如烏紗帽無簷不撮雙耳額前綴金花上結紫帶末綴珠服紫  
窄袍繫鞞鞞帶以黃紅色條裹革爲之用金玉水晶靛石綴飾謂之盤紫  
太宗更以錦袍金帶會同元年羣臣高年有爵秩者皆賜之

公服謂之展裹著紫興宗重熙二十二年詔八房族巾幘道宗清寧元年詔非勳戚之後及夷離堇副使并承應有職事人不帶巾

皇帝紫皂幅巾紫窄袍玉束帶或衣紅襖臣僚亦幅巾紫衣

常服

宰相中謝儀帝常服高麗使入見儀臣僚便衣謂之盤裹綠花窄袍綠中單多紅綠色貴者披貂裘以紫黑色爲貴青次之又有銀鼠尤潔白賤者貂毛羊鼠沙狐裘

田獵服

皇帝幅巾擐甲戎裝以貂鼠或鵝項鴨頭爲扞腰蕃漢諸司使以上並戎裝衣皆左衽黑綠色

弔服太祖叛弟刺哥等降素服受之

素服乘赭白馬

漢服

黃帝始制冕冠章服後王以祀以祭以享唐收殷尋周弁以朝冠端以居所以別尊卑辨儀物也厥後唐以冕冠青衣為祭服通天絳袍為朝服平巾幘袍襪為常服大同元年正月朔太宗皇帝入晉備法駕受文武百官賀于汴京崇元殿自是日以為常是年北歸唐晉文物遠則用之左右采訂撫其常用者存諸篇

祭服終遼之世郊丘不建大裘冕服不書

袞冕祭祀宗廟遣上將出征飲至踐阼加元服納后若元日受朝則服之金飾垂白珠十二旒以組為纓色如其綬黻續充耳玉簪導玄衣纁裳十二章八章在衣日月星龍華蟲火山宗彝四章在裳藻粉米黼黻衣襟領為升龍織成文各為六等龍山以下每章一行行十二白紗中單黼領青襟襖裾黻革帶大帶劍佩綬舄加金飾元日朝會儀皇帝服袞冕

朝服乾亨五年聖宗冊承天太后給三品以上法服雜禮冊承天太后儀侍中就席解劍脫履重熙五年尊號冊禮皇帝服龍袞北南臣僚並朝服蓋遼制會

同中太后北面臣僚國服皇帝南面臣僚漢服乾亨以後大禮雖北面三品以上亦用漢服重熙以後大禮並漢服矣常朝仍遵會同之制

皇帝通天冠諸祭還及冬至朔日受朝臨軒拜王公元會冬會服之冠加金博山附蟬十二首施珠翠黑介幘髮纓翠綾玉若犀簪導絳紗袍白紗中單褙領朱襪裾白裙襦絳蔽膝白假帶方心曲領其革帶佩劍綬鞮烏若未加元服則雙童髻空頂黑介幘雙玉導加寶飾元日上壽儀皇帝服通天冠絳紗袍

皇太子遠遊冠謁廟還宮元日冬至朔日入朝服之三梁冠加金附蟬九首施珠翠黑介幘髮纓翠綾犀簪導絳紗袍白紗中單皂領褙裾白裙襦白假帶方心曲領絳紗蔽膝其革帶劍佩綬鞮烏與上同後改用白鞮黑烏未冠則雙童髻空頂黑介幘雙玉導加寶飾冊皇太子儀皇太子冠遠遊服絳紗袍

親王遠遊冠陪祭朝饗拜表大事服之冠三梁加金附蟬黑介幘青綾導絳

紗單衣白紗中單皂領襪裾白裙襦革帶鈎髀假帶曲領方心絳紗蔽膝  
韞烏劍佩綬二品以上同

諸王遠遊冠三梁黑介幘青綬

三品以上進賢冠三梁寶飾

五品以上進賢冠二梁金飾

九品以上進賢冠一梁無飾

七品以上去劍佩綬

八品以下同公服

公服勘箭儀閣使公服繫履遼國常用公服矣

皇帝翼善冠朔視朝用之柘黃袍九環帶白練裙襦六合鞞

皇太子遠遊冠五日常朝元日冬至受朝服絳紗單衣白裙襦革帶金鈎髀

假帶方心紛鞞囊白韞烏皮履

一品以下五品以上冠幘纓簪導謁見東宮及餘公事服之絳紗單衣白裙



襦帶鈎髀假帶方心鞮履紛鞞囊

六品以下冠幘纓簪導去紛鞞囊餘並同

常服遼國謂之穿執起居禮臣僚穿執言穿鞮執笏也

皇帝柘黃袍衫折上頭巾九環帶六合鞮起自宇文氏唐太宗貞觀已後非元日冬至受朝及大祭祀皆常服而已

皇太子進德冠九琪金飾絳紗單衣白裙襦白鞮烏皮履

五品以上幘頭亦曰折上巾紫袍牙笏金玉帶文官佩手巾算袋刀子礪石金魚袋武官鞬鞞七事佩刀刀子磨石契苾真噦厥計筒大石袋烏皮六合鞮

六品以下幘頭緋衣木笏銀帶魚袋佩鞮同

八品九品幘頭綠袍鍮石帶鞮同

遼史卷五十六

珍做宋版印

大遼皇帝

大遼皇帝

大遼皇帝

大遼皇帝

大遼皇帝

大遼皇帝

大遼皇帝

大遼皇帝

大遼皇帝

大遼皇帝

大遼皇帝

遼史卷五十七

元中書右丞相總裁脫脫等修

志第二十六

儀衛志三

符印

遙輦氏之世受印于回鶻至耶瀾可汗請印於唐武宗始賜奉國契丹印太祖神冊元年梁幽州刺史來歸詔賜印綬是時太祖受位遙輦十年矣會同九年太宗伐晉末帝表上傳國寶一金印三天子符瑞於是歸遼

傳國寶秦始皇作用藍玉螭紐六面其正面文受命于天既壽永昌魚鳥篆子嬰以上漢高祖王莽篡漢平皇后投璽殿階螭角微玷獻帝失之孫堅得于井中傳至孫權以歸于魏魏文帝隸刻肩際曰大魏受漢傳國之寶唐更名受命寶晉亡歸遼自三國以來僭偽諸國往往模擬私製歷代府庫所藏不一莫辨真偽聖宗開泰十年馳驛取石晉所上玉璽于中京興宗重熙七年

以有傳國寶者為正統賦試進士天祚保大二年遺傳國璽于桑乾河

玉印太宗破晉北歸得于汴宮藏隨駕庫穆宗應曆二年詔用太宗舊寶

御前寶金鑄文曰御前之寶以印臣僚宣命

詔書寶文曰書詔之寶凡書詔批答用之

契丹寶受契丹冊儀符寶郎捧寶置御坐東

金印三晉帝所上其文未詳

皇太后寶制未詳天顯二年應天皇后稱制羣臣上璽綬冊承天皇后儀符

寶郎奉寶置皇太后坐右

皇后印文曰皇后教印

皇太子寶未詳其制重熙九年冊皇太子儀中書令授皇太子寶

印

吏部印文曰吏部之印銀鑄以印文官制誥

兵部印文曰兵部之印銀鑄以印軍職制誥

契丹樞密院契丹諸行軍部署漢人樞密院中書省漢人諸行宮都部署印並銀鑄文不過六字以上以銀硃爲色

南北王以下內外百司印並銅鑄以黃丹爲色諸稅務以赤石爲色

杓窠印杓窠鷲鳥之總名以爲印紐取疾速之義行軍詔賜將帥用之道宗賜耶律仁先鷹紐印卽此

### 符契

自大賀氏八部用兵則合契而動不過刻木爲牌合太祖受命易以金魚

金魚符七枚黃金鑄長六寸各有字號每魚左右判合之有事以左半先授守將使者執右半大小長短字號合同然後發兵事訖歸于內府

銀牌二百面長尺刻以國字文曰宜速又曰勅走馬牌國有重事皇帝以牌親授使者手劄給驛馬若干驛馬闕取它馬代法晝夜馳七百里其次五百里所至如天子親臨須索更易無敢違者使回皇帝親受之手封牌印郎君收

掌

木契正面爲陽背面爲陰閣門喚仗則用之朝賀之禮宣徽使請陽面木契下殿至于殿門以契授西上閣門使云授契行勤勤契官聲喏跪受契舉手勤契同俛與鞠躬奏內外勤契同閣門使云准勅勤契行勤勤契官執陰面木契聲喏平身立少退近後引聲云軍將門仗官齊聲喏勤契官云內出喚仗木契一隻准勅付左右金吾仗行勤勤契官云合不合門仗官云合凡再勤契官云同不同門仗官云同亦再勤契官近前鞠躬奏勤官左金吾引駕仗勾畫都知某官某對御勤同平身少退近後右手舉契云其契謹付閣門使進入閣門使引聲喏門仗官下聲喏勤契官跪以契授閣門使上殿納契宣徽使受契閣門使下殿奉勅喚仗

木箭內箭爲雄外箭爲雌皇帝行幸則用之還宮勤箭官執雌箭東上閣門使執雄箭如勤契之儀詳具禮儀志

遼史卷五十八

元中書右丞相總裁脫脫等修

志第二十七

儀衛志四

帝王處則重門擊柝出則以師兵爲營衛勞人動衆豈得已哉天下大患生於大欲不得不遠慮深防耳智英勇傑魁臣雄藩於是乎在寓武備於文物之中此儀仗所由設也金吾黃麾六軍之仗遼受之晉晉受之後唐後唐受之梁唐其來也有自耶律儼陳大任舊志有未備者兼考之遼朝雜禮云

國仗

王通氏言舜歲徧四岳民不告勞營衛省徵求寡耳遼太祖匹馬一麾斥地萬里經營四方未嘗寧居所至樂從用此道也太宗兼制中國秦皇漢武之儀文日至後嗣因之旄頭豹尾馳驅五京之間終歲勤勤轍迹相尋民勞財匱此之故歟遼自大賀氏摩會受唐鼓纛之賜是爲國仗其制甚簡太宗伐唐晉以前

所用皆是物也著于篇首以見艱難創業之主豈必厚衛其身云

十二神纛

十二旗

十二鼓

曲柄華蓋

直柄華蓋

遙輦末主遺制迎十二神纛天子旗鼓置太子帳前諸弟刺哥等叛勻德實縱火焚行宮皇后命曷古魯救之止得天子旗鼓太宗卽位置旗鼓神纛于殿前聖宗以輕車儀衛拜帝山

渤海仗

天顯四年太宗幸遼陽府人皇王備乘輿羽衛以迎乾亨五年聖宗東巡東京留守具儀衛迎車駕此故渤海儀衛也

漢仗

大賀失活入朝于唐娑固兄弟繼之尙主封王鈺觀上國開元東封邵固扈從又覽太平之盛自是朝貢歲至于唐遼始祖涅里立遙輦氏世爲國相目見耳聞歆企帝王之容輝有年矣遙輦致鼓纛於太祖帳前曾何足以副其雄心霸



氣之所睥睨哉厥後交梁聘唐不憚勞勤至於太宗立晉以要冊禮入汴而收法物然後累世之所願欲者一舉而得之太原擅命力非不敵席卷法物先致中京蹠棄山河不少顧慮志可知矣於是秦漢以來帝王文物盡入于遼周宋按圖更製乃非故物遼之所重此其大端故特著焉

太宗會同元年晉使馮道備車輅法物上皇太后冊禮劉煦盧重備禮上皇帝尊號

三年上在薊州觀導駕儀衛圖遂備法駕幸燕御元和殿行入閣禮

六年備法駕幸燕迎導御元和殿

大同元年正月朔備法駕至汴上御崇元殿受文武百僚朝賀自是日以爲常  
二月朔上御崇元殿備禮受朝賀

三月將幸中京鎮陽詔收鹵簿法物委所司押領先往未幾鎮陽入漢鹵簿法物隨世宗歸于上京

四月皇太弟李胡遣使問軍事上報曰朝廷起居如禮是月太宗崩世宗卽

位鹵簿法物備而不御

穆宗應曆元年詔朝會依嗣聖皇帝故事用漢禮

景宗乾亨五年二月神樞升輶轅車具鹵簿儀衛

六月聖宗至于上京留守具法駕迎導

聖宗統和元年車駕還上京迎導儀衛如式

三年駕幸上京留守具儀衛奉迎

四年燕京留守具儀衛導駕入京上御元和殿百僚朝賀是後儀衛常事史不

復書

鹵簿儀仗人數馬匹

步行擊執二千四百一十二人坐馬擊執二百七十五人坐馬樂人二百七十  
三人步行教坊人七十一人御馬牽攏官五十二人御馬二十六匹官僚馬牽  
攏官六十六人坐馬挂甲人五百九十八人步行挂甲人百六十人金甲二人  
神輿十二人長壽仙一人諸職官等三百五人內侍一人引稍押衙二人赤縣

令一人府牧一人府吏二人少尹一人司錄一人功曹一人太常少卿一人太常丞一人太常博士一人司徒一人太僕卿一人鴻臚卿一人大理卿一人御史大夫一人侍御史二人殿中侍御史二人監察御史一人兵部尚書一人兵部侍郎一人兵部郎中一人兵部員外郎一人符寶郎一人左右諸衛將軍三十五人左右諸折衝二十一人左右諸果毅二十八人尚乘奉御二人排仗承直二人左右夾騎二人都頭六人主帥一十四人教坊司差押纛二人左右金吾四人虞候飲飛一十六人鼓吹令二人漏刻生二人押當官一人司天監一人令史一人司辰一人統軍六人千牛備身二人左右親勳二人左右郎將四人左右拾遺二人左右補闕二人起居舍人一人左右諫議大夫二人給事中書舍人二人左右散騎常侍二人門下侍郎二人中書侍郎二人鳴鞭二人內侍中一人中書令一人監門校尉二人排列官二人武衛隊正一人隨駕諸司供奉官三十人三班供奉官六十人通事舍人四人御史中丞二人乘黃丞二人都尉一人太僕卿一人步行太卜令一人職官乘馬三百四匹進馬四匹駕車

馬二十八匹人之數凡四千二百三十有九馬之數凡千五百二十得諸本朝太常卿徐世隆家藏遼朝雜禮者如是至於儀注之詳不敢傳會云

遼史卷五十八

[Faint bleed-through text from the reverse side of the page, including names like 耶律, 蕭, and 石, and various titles and dates.]

遼史卷五十九

元中書右丞相總裁脫脫等修

志第二十八

食貨志上

契丹舊俗其富以馬其疆以兵縱馬於野弛兵於民有事而戰曠騎介夫卯命辰集馬逐水草人仰湮酪挽強射生以給日用糗糧芻茭道在是矣以是制勝所向無前及其有國內建宗廟朝廷外置郡縣牧守制度日增經費日廣上下相師服御浸盛而食貨之用斯爲急矣於是五京及長春遼西平州置鹽鐵轉運度支錢帛諸司以掌出納其制數差等雖不可悉而大要散見舊史若農穀租賦鹽鐵貿易坑冶泉幣羣牧逐類採撫緝而爲篇以存一代食貨之略初皇祖勻德實爲大迭烈府夷离董喜稼穡善畜牧相地利以教民耕仲父述瀾爲于越飭國人樹桑麻習組織太祖平諸弟之亂弭兵輕賦專意於農嘗以戶口滋繁輅轄疎遠分北大濃兀爲二部程以樹藝諸部效之太宗會同初將東獵

三剋奏減輜重疾趨北山取物以備國用無害農務尋詔有司勸農桑教紡績以烏古之地水草豐美命甌昆石烈居之益以海勒水之善地爲農田三年詔以諧里河臚胸河近地賜南院歐董突呂乙斯勃北院温納河刺三石烈人以事耕種八年駐蹕赤山宴從臣問軍國要務左右對曰軍國之務愛民爲本民富則兵足兵足則國彊上深然之是年詔徵諸道兵仍戒敢有傷禾稼者以軍法論應曆間雲州進嘉禾時謂重農所召保寧七年漢有宋兵使來乞糧詔賜粟二十萬斛助之非經費有餘其能若是聖宗乾亨五年詔曰五稼不登開帑藏而代民稅螟蝗爲災罷徭役以恤饑貧帝常過藁城見乙室奧隗部下婦人迪輦等黍過熟未獲遣人助刈太師韓德讓言兵後逋民棄業禾稼棲畝募人獲之以半給獲者政事令室昉亦言山西諸州給軍興民力凋敝田穀多囓於邊兵請復今年租六年霜旱災民饑詔三司舊以稅錢折粟估價不實其增以利民又徙吉避寨居民三百戶于檀順薊三州擇沃壤給牛種穀十三年詔諸道置義倉歲秋社民隨所獲戶出粟庾倉社司籍其目歲儉發以振民統和十

五年詔免南京舊欠義倉粟仍禁諸軍官非時畋牧妨農開泰元年詔曰朕惟百姓徭役煩重則多給工價年穀不登發倉以貸田園蕪廢者則給牛種以助之太平初幸燕燕民以年豐進土產珍異上禮高年惠鰥寡賜酺連日九年燕地饑戶部副使王嘉請造船募習海漕者移遼東粟餉燕議者稱道險不便而寢興宗卽位遣使閱諸道禾稼是年通括戶口詔曰朕於早歲習知稼穡力辦者廣務耕耘罕聞輸納家食者全虧種植多至流亡宜通檢括普爲均平禁諸職官不得擅造酒糜穀有婚祭者有司給文字始聽道宗初年西北兩穀三十里春州斗粟六錢時西蕃多叛上欲爲守禦計命耶律唐古督耕稼以給西軍唐古率衆田臚胸河側歲登上熟移屯鎮州凡十四稔積粟數十萬斛每斗不過數錢以馬人望前爲南京度支判官公私兼裕檢括戶口用法平恕乃遷中京度支使視事半歲積粟十五萬斛擢左散騎常侍遼之農穀至是爲盛而東京如咸信蘇復辰海同銀烏遂春泰等五十餘城內沿邊諸州各有和糴倉依祖宗法出陳易新許民自願假貸收息二分所在無慮二三十萬石雖累兵興

未嘗用乏迨天慶間金兵大入盡爲所有會天祚播遷耶律敵烈等逼立梁王雅里令羣牧人戶運鹽灤倉粟人戶侵耗議籍其產以償雅里自定其直粟一車一羊三車一牛五車一馬八車一駝從者曰今一羊易粟二斗尙不可得此直太輕雅里曰民有則我有若今盡償衆何以堪事雖無及然使天未絕遼斯言亦足以收人心矣夫賦稅之制自太祖任韓延徽始制國用太宗籍五京戶丁以定賦稅戶丁之數無所於考聖宗乾亨間以上京雲爲戶貲具實饒善避繇役遺害貧民遂勒各戶凡子錢到本悉送歸官與民均差統和中耶律昭言西北之衆每歲農時一夫偵候一夫治公田二夫給糶官之役當時沿邊各置屯田戍兵易田積穀以給軍饗故太平七年詔諸屯田在官斛粟不得擅貸在屯者力耕公田不輸稅賦此公田制也餘民應募或治閑田或治私田則計畝出粟以賦公上十五年募民耕灤河曠地十年始租此在官閑田制也又詔山前後未納稅戶並於密雲燕樂兩縣占田置業入稅此私田制也各部大臣從上征伐俘掠人戶自置郭郭爲頭下軍州凡市井之賦各歸頭下惟酒稅赴納



上京此分頭下軍州賦爲二等也先是遼東新附地不榷酤而鹽麩之禁亦弛馮延休韓紹勳相繼商利欲與燕地平山例加繩約其民病之遂起大延琳之亂連年詔復其租民始安靖南京歲納三司鹽鐵錢折絹大同歲納三司稅錢折粟開遠軍故事民歲輸稅斗粟折五錢耶律抹只守郡表請折六錢亦皆利民善政也

遼史卷五十九



遼史卷六十

元中書右丞相總裁脫脫等修

志第二十九

食貨志下

征商之法則自太祖置羊城於炭山北起榷務以通諸道市易太宗得燕置南  
京城北有市百物山待命有司治其征餘四京及它州縣貨產懋遷之地置亦  
如之東平郡城中置看樓分南北市禺中交易市北午漏下交易市南雄州高  
昌渤海亦立互市以通南宋西北諸部高麗之貨故女直以金帛布蜜蠟諸藥  
材及鐵器鞞鞞于厥等部以蛤珠青鼠貂鼠膠魚之皮牛羊駝馬毳罽等物來  
易於遼者道路繼屬聖宗乾亨間燕京留守司言民艱食請弛居庸關稅以通  
山西糴易又令有司諭諸行宮布帛短狹不中爲度者不粥於市明年詔以南  
北府市場人少宜率當部車百乘赴集開奇峯路以通易州貿易二十三年振  
武軍及保州並置榷場時北院天王耶律室魯以俸羊多闕部人貧乏請以羸

老之羊及皮毛易南中之絹上下爲便至天祚之亂賦斂既重交易法壞財日匱而民日困矣鹽筴之法則自太祖以所得漢民數多卽八部中分古漢城別爲一部治之城在炭山南有鹽池之利卽後魏滑鹽縣也八部皆取食之及征幽薊還次于鶴刺灤命取鹽給軍自後灤中鹽益多上下足用會同初太宗有大造於晉晉獻十六州地而瀛莫在焉始得河間煮海之利置榷鹽院於香河縣於是燕雲迤北暫食滄鹽一時產鹽之地如渤海鎮城海陽豐州陽洛城廣濟湖等處五京計司各以其地領之其煎取之制歲出之額不可得而詳矣坑冶則自太祖始併室韋其地產銅鐵金銀其人善作銅鐵器又有曷朮部者多鐵曷朮國語鐵也部置三冶曰柳濕河曰三融古斯曰手山神冊初平渤海得廣州本渤海鐵利府改曰鐵利州地亦多鐵東平縣本漢襄平縣故地產鐵卽置採煉者三百戶隨賦供納以諸坑冶多在國東故東京置戶部司長春州置錢帛司太祖征幽薊師還次山麓得銀鐵卽命置冶聖宗太平間於潢河北陰山及遼河之源各得金銀卽與冶採煉自此以訖天祚國家皆賴其利鼓鑄之

法先代撒刺的爲夷离董以土產多銅始造錢幣太祖襲而用之遂至富彊以開帝業太宗置五冶太師以總四方錢鐵石敬瑭又獻沿邊所積錢以備軍實景宗以舊錢不足於用始鑄乾亨新錢錢用流布聖宗鑿大安山取劉守光所藏錢散諸五計司兼鑄太平錢新舊互用由是國家之錢演迤域中所以統和出內藏錢賜南京諸軍司開泰中詔諸道貧乏百姓有典質男女計傭價日以十文折盡還父母每歲春秋以官錢宴饗將士錢不勝多故東京所鑄至清寧中始用是時詔禁諸路不得貨銅錢以防私鑄又禁銅鐵賣入回鶻法益嚴矣道宗之世錢有四等曰咸雍曰太康曰大安曰壽隆皆因改元易名其肉好銖數亦無所考第詔楊遵勗徵戶部司逋戶舊錢得四十餘萬繼拜樞密直學士劉伸爲戶部使歲入羨餘錢三十萬繼擢南院樞密使其以災沴出錢以振貧乏及諸宮分邊戍人戶是時雖未有貫朽不可較之積亦可謂富矣至其末年經費浩穰鼓鑄仍舊國用不給雖以海雲佛寺千萬之助受而不拒尋禁民錢不得出境天祚之世更鑄乾統天慶二等新錢而上下窮困府庫無餘積始太

祖爲迭烈府夷离董也懲遙輦氏單弱於是撫諸部明賞罰不妄征討因民之利而利之羣牧蓄息上下給足及卽位伐河東下代北郡縣獲牛羊駟馬十餘萬樞密使耶律斜軫討女直復獲馬二十餘萬分牧水草便地數歲所增不勝算當時括富人馬不加多賜大小鶻軍萬餘疋不加少蓋畜牧有法然也咸雍五年蕭陶隗爲馬羣太保上書猶言羣牧名存實亡上下相欺宜括實數以爲定籍厥後東丹國歲貢千疋女直萬疋直不古等國萬疋阻卜及吾獨婉惕隱各二萬疋西夏室韋各三百疋越里篤剖阿里奧里米蒲奴里鐵驪等諸部三百疋仍禁朔州路羊馬入宋吐渾党項馬鬻于夏以故羣牧滋繁數至百有餘萬諸司牧官以次進階自太祖及興宗垂二百年羣牧之盛如一日天祚初年馬猶有數萬羣每羣不下千疋祖宗舊制常選南征馬數萬疋牧于雄霸清滄間以備燕雲緩急復選數萬給四時遊畋餘則分地以牧法至善也至末年累與金戰番漢戰馬損十六七雖增價數倍竟無所買乃冒法買官馬從軍諸羣牧私賣日多畋獵亦不足用遂爲金所敗棄衆播遷以訖于亡松漠以北舊馬

皆爲大石林牙所有遼之食貨其可見者如是耳至於鄰國歲幣諸屬國歲貢土宜雖累朝軍國經費多所仰給然非本國所出況名數已見本紀茲不復載夫冀北宜馬海濱宜鹽無以議爲遼地半沙磧三時多寒春秋耕穫及其時黍稷高下因其地蓋不得與中土同矣然而遼自初年農穀充羨振饑恤難用不少靳旁及鄰國沛然有餘果何道而致其利歟此無他勸課得人規措有法故也世之論錢幣者恆患其重滯之難致鼓鑄之弗給也於是楮幣權宜之法興焉西北之通舟楫比之東南十纜一二遼之方盛貨泉流衍國用以殷給戍賞征賜與億萬未聞有所謂楮幣也又何道而致其便歟此無他舊儲新鑄並聽民用故也孟子曰周于利者凶年不能殺人力苟至一夫猶足以勝時災況爲國乎以是知善謀國者有道以制天時地利之宜無往而不遂其志食莫大於穀貨莫大於錢特志二者以表遼初用事之臣亦善裕其國者矣

遼史卷六十